

# *EDENI YA SATANI*

 Halu inameñi. Mulimu Yomunde, lu itumezi ku Wena busihu bwa kacenu ka kolo tuna yende ye, ka kutaha hape ka Libizo la Mulena Jesu, kuto kopana ni sila sa luna, sila sa Hao, kwande kwanu mwa mafulo a ndwa; ka Linzwi, ku si lelekela kwahule kuzwa mwahala batu ba Hao; kuli ba kone ku bona, busihu bwa kacenu, Mulena, lona Liseli la Evangeli. Ni lapela kuli U toze meto a luna ka mulyani wa mwa meto, kuli akone ku kwaluhela kwa Niti; kuli lu kone kuzwa mo, inze lu bulela mwa lipilu zaluna kuli, “Kana lipilu zaluna ne li sa tuki mwahali ku luna ha Na sweli kuambola ni luna mwa nzila?” Folisa bakuli ni baba imezwi. Susueza baba zwafile. Nanula mazoho a fokola asweli ku lepelela. Lutuse lu talimele Kutaha kwa Mulena Jesu, ko lu lumela kuli ku sutelezi. Lwa li kupa ka Libizo la Jesu. Amen.

Ha muine.

<sup>2</sup> Ni ka lika kuba ya kusufala busihu bwa kacenu, kakuli Ni ziba kuli babañata batile kuzwa kwa libaka ze shutana za naha, kuto... kwa sebelezo; kamba kuina nako yetelele, babañwi ba ku mina, mi mu lukela ku kuta, mwendi ki musipili luli ha mu kuta cwalo. Mi Na itumela ku mina. Kakusasana cwana ne Ni tabla ku utwa Muzwale Neville, ni na kasibili. Mi Ni mu utwile ka linako zeñata luli, mi nali kuba ni mu utwe ka mukwa usili kwanda lika ze ne Ni itumela ka yena. Kono kakusasana wo, ona liñusa lene litile ka ku swanelia lani, Ni ziba kuli Ne ni na ni tamaiso ya Mulena ka ku teezea ku sani kakusasana cwana. Ki bunde luli! Mi Na bona libaka leo mina sicaba hamu tahanga ku to mu teezea, ni mina. Mi yena kamita u kana a mi katulusanga, Ni kolwa cwalo, ku to teezea ku yena.

<sup>3</sup> Ne ni lika ku akufela kwa lipuzo zeñwi za ka kacenu; kakusasana cwana ni musihali wo. Ni sa na ni zeñata, ñata, ñata ze lukela ku talimwa. Mi Ni sweli....

<sup>4</sup> Kacwalo, Na lumela, neli Jetro ya na bulelezi Mushe nako yeñwi, kuli, “U ikatalisa hahulu.” Kacwalo, luna ni mizwale ye miñata hahulu kwanu ka butata bwa mina. Mi mañi ni mañi wa bona ubile ya sepahala ka niti, mi ki lika zende ze lukela ku tokomelwa. Mi Na kona ku yemela mulisana wa luna, ka Muzwale Mann, ni bakutazi babañwi ba Tumelo ya luna mo. Mwa kona kuya ku bona. Baka mi bulelala ona lika ze mu swanelia kueza; batu babañwi, bana ba bona; mwa ku nyalana, kamba lika ze fosahalile. Mi baana ba bakona ku mitusa sina—sina yomuñwi kaufela, kakuli ki batanga ba Kreste. Mi myue ku bona, mi Na sepa ba ka—ba kamifa tuso ye mutokwa. Hanikoni kufita kubona kaufela. Kuna ni babañata hahulu fela, kai ni kai ko mu kaya. Ba zwelanga fela pili ku ekezeha ka buñata ni

buñata, mwa bona. Mi—mi mubata ku talimana ni mañi ni mañi mwahala bona, kono hamukoni kueza cwalo. Kono Ni sweli ku lapela kamita kuli Mulimu, ka mukwa omuñwi, uka mi ezeza zona hande.

<sup>5</sup> Cwale, busihu bwa kacenu, lu bata kuya mwa Mañolo, ni kubala siemba sa Mañolo kuzwa mwa Genese, kauhanyo ya 3; ni ku swanisisa fela nyana kwa litaba ze lubile lu bulela ka zona, mwa linako za kale, mi haiba Mulena Jesu uka lufa ze likani nyana ku ze lu swanezi kuziba ha lu ka caisa. Ni lapela—lapela kuli U ka eza cwalo.

*Cwale noha neli ye butali hahulu kwa libupiwa  
kaufela za na bupile MULENA Mulimu. Mi ki ha iłi ku  
musali, Kikuli, Mulimu uize, Mu si ke mwa ca kwa kota  
kaufela ya mwa simu?*

*Mi musali ali ku noha, Lwa kona ku ca kwa muselo wo  
beinwa ki likota za mwa simu:*

*Kono kwanda muselo wa kota ye fahala simu, Mulimu  
uize kuli, Mu si ke mwa ca ku yona, kamba nihaiba ku  
iswala, mu ka swana mu shwa.*

*Mi cwale noha yali ku musali, Kaniti hamuna ku shwa:*

*Kakuli Mulimu wa ziba kuli ka lizazi le mu ka ca ku  
yona, kona kuli meeto a mina aka tonu, mi mu ka swana  
sina milimu, ku ziba bunde ni bumaswe.*

*Mi cwale musali ha sa bona kuli kota ki yende haiciwa,  
ni kuli ne ilakazisa mwa meto ha italimwa, ni kuli kota  
yatene ne lakazisa kutalifisa mutu, ki ha nga muselo wa  
yona, mi a ca, ki ha tambeka hape ni muuna hae ni yena;  
mi ni yena a ca.*

*Mi meeto abona bababeli cwalo a tonu, mi ba ziba kuli  
nebali mapunu; ki ha ba ngungahanya matali a feiga  
hamoho, mi ba ikezeza liapalo za kutina.*

<sup>6</sup> Mi Mulena aekeze kwa...limbuyoti za Hae kwa kubala Linzwi la Hae. Cwale Ni tabela kunga palo busihu bwa kacenu, yezwa mwani, ni ku ibiza kuli: *Edeni Ya Satani*. Ki taba ye buhali nyana ha i bulelwa, kuli, ki *Edeni Ya Satani*. Mane ya zamaelela, ni busihu bobuñwi bwa la Sunda, Na lumela, hane Ni ambola ku mina kwanu ka za *Sefa Ya Mutu Ya Nahana*, ni maikuto a mutu ya kenile.

<sup>7</sup> Mi fokuñwi ona litaba ze buhali nyana zani li lu tisanga ku sesiñwi; li lutisa kuli lu balisise, ni ku mi beya mwa ku balisia Linzwi. Mi sani kona se Ni bata kuli kopano yaka kaufela i eze cwalo. “Mutu hana kupila buhobe fela, kono ni ka Linzwi kaufela le li zwelela mwa mulomo wa Mulimu.” Kacwalo, mubalange Linzwi; mu Li balisise. Mi mu Li balange ka meeto a Mulimu, kuli life kutwisiso kwa ngana ya butu bwa mina mo lu lukela ku pilela mwa lizazi la kacenu.

<sup>8</sup> Cwale ka ku shetumuka, busihu bwa kacenu, ka ku ambola fela ku mina, ku li, “Ki hande, Ne ni ka eza se kamba *sani*, . . .”

<sup>9</sup> Ni tabela ku ikambotanga ni sicaba, mane sina mone Ni ka tabelala ni haiba kuya ni mañi ni mañi wa mina busihu bwa kacenu. Ni . . . Mulimu wa ziba kuli yani ki niti. Ne ni ka tabela kuya kwa malapa a mutu ni mutu wa mina, ni—ni kuca—kuca mukushuko ni mina kakusasana, mi—mi—kuya kwande ku yo zuma tumale ni mina kamuso musihali, mwabona. Ne—Ne ni ka tabela sani, kono Ha—Ha ni koni kueza cwalo. Mi Ne ni ka tabela fela kuya kwa ndu ya mina ku yo ina ni kuambola ni mina; ku ina mwa malibela kasamulaho wa sebelezo, ni ku ikambota ni mina fa nako nyana, ku ambola ku mina ka mo mu pilela ni ka za Mulimu. Ne ni ka tabela kueza cwalo. Baana ni basali mwahали mo; Mulimu wa ziba kuli Ne ni ka tabela kueza cwalo, kono ha Ni koni kueza cwalo. Mwabona, kuna ni fela za—za kupateha ni ku kataла.

<sup>10</sup> Mi—mi mwa lusika lo lwa mipateho mo lupila . . . Mi Ni mutu ya petehile hahulu ni na, kasibili. Kacenu Ne ni cincize muhupulo wa ka kuama sesiñwi, “Ni lukela fela kueza cwalo,” mi kamuso se sikaba kwahule hule ni na; sesiñwi sa pumahanya mwateri ni kueza *se ni sani*. Mi mube ni nako, ku lika kubeya ngana ya mina hamoho.

<sup>11</sup> Kono se ni bata ha butuku luli ki ku kutaza Evangelii kwa Keleke, ni kueza kaufela ze Ni kona kwa kutisa likute ku Jesu Kreste mwa lizazi le, ha Ni sali fa lifasi fa, mi nako yani Ni isiile mwa lifasi. Ni tile kwa—kwa ku lika ku bulela sesiñwi ku mina se si ka mi tusa; sesiñwi. Ne ni bala kasamulaho Ni ma no ya kwa ndu kakusasana cwana. “Ki sikamañi se Ni ka bulela busihu bwa kacenu, Mulena, se si ka tusa sicaba sani?”

<sup>12</sup> Kwa ku teezeza kwa liñusa le li mata lani kakusasana cwana ku . . . Muzwale Neville lana lu tiselize, ka za . . . Ne ni hupuzi kuli neli lelinde hahulu, ka mwa na bulelezi kwani kuli, “Mualafi uka tatuba butuku; kono mutu ya taha ni pani yetezi lindonga, yena uto taba fela.” Kacwalo Ne ni hupuzi kuli sani luli neli—neli ngambolo nyana. Ne ni hupula ka zona kuli, “mali akopani ni mezi, kasamulaho wa kutatuba.” Kacwalo yani ki nto yende hahulu.

<sup>13</sup> Ne ni bata kuambola ku mina ka sesiñwi, ili kutisa sesiñwi sa ku mi monyehela kwa sepiso ya Mulimu ya lusika loo. Mwabona? Sesиñwi, isiñi sika seo mutu yomuñwi akile aba ku sona ka zazi leliñwi, kono sika . . . mi ni foo . . . Liki zani ki zende; luna kaufela lu swanisisa kwa lika zani. Kono Ni hupuzi kuli Ni like kutisa sesiñwi mwa mihipulo ya mina, ka Mañolo o Ni nani a ñozwi fa, aka mi monyehela, ku ziba, ku mi eza ku ba musole yomunde mwa mafulo mo mu lwanela cwale; ni ku ituta makilikicani a sila, ili kuli mutibebe lika kaufela li si ka fita kale ku mina, mwabona. Yeo kona taba yateni, ki ku ituta kuina

mwa—mwa ku pimela liñindi ze taha ku mina, ka mo mukonela kaufela.

<sup>14</sup> Cwale, ha lu talimeni fa butuna bo...ka mizuzu fela, ona lizazi tuna, la sibi le lu pila ku lona le cwale. Ha ni lumeli kuli ku kile kwaba lizazi ku e Ni kile na bala mwa litaba za kale... Kubile mazazi a matuna a nyandiso, fo bana ba Mulimu hane ba bulaiwa kwa maneku kaufela. Kono ka kubona bupumi bwa sila, lwali kuba lube ni lizazi la mufuta wo lu pila ku ona cwale. Ki lizazi le li shemaeta hahulu, lizazi la bupumi. Mi ha Ni bona sani, ki taba, ya kuli, Mukreste una ni kutaha kwa kuba hahulu ya yema ka mautu a hae kufita mwa kile abela mwa lusika lusili kaufela.

<sup>15</sup> Cwale, kwa mulaho mwa mazazi a nyandiso, ya Rome, kwa Keleke; Mukreste hana ka fosa, na kenyiwa mwa sibaka sesiñwi ku yo fepiwa kwa litau, kamba ku sesiñwi se si cwalo, hana fumanwa kuli ki Mukreste ka bupaki bwa hae. Kono moyo wa hae no piliswa, kakuli kuya ka swanelo, nali mulumeli ya sina litiba ku Mulimu, mi ka tabo akwahela bupaki bwa hae ka mali a hae. Misinga hane inze i ceputuka, kamba misima mwa mubili wa hae, mi mali na suluha, na huwanga, ka tumelo ya luli ye ishuwile, mi uli, “Amuhela moya wa ka, Mulena Jesu!”

<sup>16</sup> Kono, cwale, butali bwa diabulosi cwale, bueza batu ku lumela kuli ki Bakreste kanti ha ba cwalo. Yani kona taba. Hamu lukeli ku swaya...Ki—ki lizazi le li butali hahulu kufita mo li lukela kubela, kufita hane mu ka swaya bupilo bwa mina—mina ka bupaki bwa mina. Diabulosi ubeile siteo kaufela se butali sa kona, kuli...Yena ki lihata. Mi Jesu na lu bulelezi, mwa Mateu 24, ka mo lizazi le ne likabela lona le lupila ku lona, ona lizazi la bupumi hahulu ku akile aba teni, “bukaufi hahulu luli kuli mane lika puma ni ba Baketilwe ba Mulimu kambe ki nto ye konahala.”

<sup>17</sup> Cwale ha lu bapiseni Mañolo nyana, kamba sipolofita se si bulezwi mwa Bibele, ku za kacenu, ni ku li bapisa ni lizazi le lupila ku lona cwale.

<sup>18</sup> Mwa Timotea wa Bubeli 3, lu ituta cwana, kuli mupolofita na bulezwi, kuli, “Ku ka to ezahala mwa lizazi le, kuli batu bakaba ni butali hahulu, zibo buñata, baba lata minyaka kufita kulata Mulimu.” Mubapise sani cwale, fa muzuzu fela. Ha luna...Lu ka ibisa fela bukuswani, kakuli haluna nako yeñata hahulu ya kuya ku zona kaufela sina mo lu swanelo ku ezeza; kono ka ku i tatulula fela, ili kuli mubone ha mu ka yo ba kwa malapa a mina mu yo bala. “Baituti, zibo buñata, baba lata minyaka hahulu kufita kulata Mulimu; baba na ni ñole, baba seba batu ka buhata, baba sa koni ku iswala, baba toyta batu babande.” “Cwale Moya no bulezwi hande kuli lika zani likaba teni mwa mazazi a maungulo.” Ani kona mazazi ona aa, sipolofita si ambozi ka ona.

<sup>19</sup> Cwale lwa bala, hape, mwa Sinulo...14, Sinulo 3:14, nitaluse, ona Keleke ya Lusika lwa Laodesia, ka mo keleke ikabela mwa lizazi la maungulo le. Mi ku kaba cwalo, I bulela kuli, "Ikaba sina mbelwa mi ibe ye sa tokwi sesiñwi. Ika—ika ba ye fumile, ni kuatelwa ki lika, mi ika tokwa ku ziba kuli ishebile, i nyandile, i zielehile, ki sibofu, i mapunu, mi itokwe ku lemuha cwalo." Haili...Cwale, muhupule, U'bulela kwa keleke ya lusika lo, "kuzieleha, sibofu, mapunu, mi mane haizibi cwalo." Ona pulelo ya mafelelezo yani, ona Linzwi la mafelelezo lani, kona le lieza kuli libe le li sabisa hahulu. Ba nahana kuli batezi hande ka Moya, ba itukisize kaufela. Ona Lusika lwa Keleke ya Laodesia ki Lusika lwa Keleke ya Pentekota, kakuli ki lusika lwa keleke ya mafelelezo. Luther nana ni liñusa la hae; Wesley nana ni liñusa la hae; mi Pentekota ne ina ni liñusa la yona.

<sup>20</sup> Hape, Ne iize, kuli, "Kakuli u enya fela, ha ucisi kamba kubata," maikuto a kwande, mutualimela wa Evangelii ka ngana ya nama; "kakuli," Na ize, "wena u ya cwalo, Ni ka ku kwa mwa mulomo wa Ka." Mwa manzwi amañwi, ne si Mu ezize ku ba ya kula ka kubona keleke mwa buino bwani.

<sup>21</sup> Mi, muhupule, ne ba Mu kwezi kwande; mi Nali kwande a keleke, kulika kuli akene mwahali, mwa Lusika lo lu maswe lwani lwa Keleke ya Laodesia.

<sup>22</sup> Yena mulimu wa lifasi le kacenu, yena mutu ya lapelwa wa lifasi le kacenu, ki Satani. Mi mane sicaba ha si zibi kuli si lapela Satani, kono ki Satani ya i pata ili yena kakuba keleke, mwabona, sina keleke. Ba lapela Satani, ba nahana kuli ba lapela Mulimu kuya ka keleke, kono ki nzila yeo Satani aezize ka yona.

"Oh," mu li, "kono mulibelete fa muzuzu; lwa kutazanga Linzwi."

<sup>23</sup> Talima mwa litukiso za ka ze ni ñozi ze, busihu bwa kacenu. Satani nali yena ya na kutilize Linzwi ku Eva, pili, "Mulimu ubulezi kuli," mwabona.

<sup>24</sup> Kona ku sa toloka hande kwa siemba sani sa Mañolo ko ku sweli ku zamaelela ni kacenu. Uka mi tuhela kuziba lika kamukana za na ezize Jesu kuba zende hahulu. Uka mi tuhela kuli muzibe sa na ezize Mushe kuli neli se si petehile. Kono ha mu ka ikungela lisepiso ze ne Bafilewa kwa lizazi le, kona kuli Sani si ka zamaelela kwa lusika lusili. Ona zani kona za lukela kueza, mwabona, ki kunga sicaba kuli si Lumele ona cwalo, mi foo—foo kipeto. Kakuli, "Hamukoni kunga Linzwi lililiñwi kuzwa ku Lona, kamba ku ekeza linzwi leliñwi ku Lona." Kono sani kona sa ezanga.

<sup>25</sup> Batu, ka ku sa ziba ba lapela Satani, ba nahana kuli ba lapela Mulimu; sina ha lu lemuswa ka sipolofita, mwa Matesalonika Babubeli. Kuli, ha lubaleni fela sani, Matesalonika Babubeli, kauhanyo ya 2. Haluyeni fela fateni fa muzuzu nyana, haiba

Ni kona, onafa kapili. Ni tabela kubala sani. Fela, Na lumela, Matesalonika Babubeli. Ni fumana Liñolo ha. Ku ya Bubeli . . .

*Cwale lwa mi lapela, banabahesu, ka kutaha kwa  
Mulena Jesu . . . ni ka ku kopana hamoho ku yena,*

<sup>26</sup> Cwale, mwabona, “kutaha kwa Mulena, ni ku kopana ku Yena,” sina Mulimu ha ka kopanya sicaba sa Hae ku Yena mwa mazazi a mafelelezo. “Ku kopana kwa sicaba ku Mulena,” isiñi kwa keleke, “ku Mulena; ku kopanela hamoho ku Yena.”

*Kuli musike mwa zikinyeha cwale mwa minahano ya  
mina, kamba . . . kukatazeha—kukatazeha, kamba ibe  
ka moyo, nihaiba . . . ka linzwi, nihaiba ka liñolo le li zwa  
ku luna, sihulu . . . lizazi la Mulena ha li sutelezi.*

*Mi mutu asike a mi puma ka mukwa kaufela: kakuli  
lizazi lani halina ku taha, konji pili kutahé kuwa, mi  
mutu yani wa sibi (“muuna wa sibi,” mulemuhe seo ali  
sona cwale), yena mutu wa sibi a patululwe, ili mwana  
sinyeho, (yani neli Judasi, mwabona);*

*Yena ya lwanisa ni kuipaheka fa halimwa sika kaufela  
se si bizwa Mulimu, kamba se si lapelwa; kuli yena ni  
Mulimu baine mwa tempele ya Mulimu, ku iponisa ili  
yena kuli ki Mulimu.*

<sup>27</sup> Ona bupumi bwa keleke ya kacenu bwani! Mwabona, “yena mwana wa sinyeho,” ili diabulosi. “Yena mwana wa sinyeho,” ili diabulosi. Mi, batu ba lapela Satani mwa lizazi le, ka ku nahana kuli ba lapela Mulimu. Kono ba mu lapela ka lituto za litumelo, likopano za ipangezi mutu ze tisize sicaba mwahala bupumi bo butuna bo lifasi likile la ziba. Hakuna taba kamba Linzwi la Mulimu le li sepiselizwe lizazi le, li kutazwe ni ku pakiwa, niteñi habana ku Li lumela. Habana ku Li lumela.

<sup>28</sup> Kona kuli kiñi? Lwa komoka kuli kiñi. Ki kabakalañi hakusiyo cwalo; kiñi ha basike ba Li lumela? Kanti Mulimu na bulezi kuli Uka eza sika sa kuli, mi Wa si eza, kono niteñi ba fetulela mukokoto ya bona ku sona ni ku saba ku sona. Mane ku swana fela ni Eva mwana zibezi sa na bulezi Mulimu, Mulimu na ka eza sani; kono a fa mukokoto wa hae ku sona, ni ku teeleza ku sa na nani ku bulela.

<sup>29</sup> Muhipule fela, mwa masika amañwi, ibile taba yeswana kamita. Mwa lusika kamukana, kamita kubile kubanga kuli Satani ulikile ku lyanganisa Linzwi lani ku bona, ku ba eza kuli ba bone lusika lusili.

<sup>30</sup> Mutualime, fani Jesu hanatile, mwabona, Satani nali mwa sikuwata sa baluti ba Majuda sani, ni baituti ni baprisita, kulika ku ba bulelela kuli ba mamele mulao wa Mushe, cwale ona Linzwi la niti ne li bulezi mwa lizazi ha ka patuluha Mwana mutu, mwabona, kuli A i patulule Ili yena. Kacwalo ne ba lika, ibile fela ne ba bulukile zani ka bulapeli, ni fa mulao wa Mushe.

Mwabona sa na ezize? Na lika ku ba bulelala, "Siemba sa Linzwi sani si lukile luli, kono Mutu yo ha ki yena Mutu yani." Kana mwabona mo a bezi wa bupumi? Lani kona lizazi luli la bupumi.

<sup>31</sup> Se kubile, mi ni cwale ku sali ona cwalo, Satani uswelii kutoma mubuso wa hae mwa lifasi. Lani kona libaka la ezeza cwalo, kakuli ubata kutoma mubuso wa hae tota.

<sup>32</sup> Kakuba muuna wa pisinisi, yena ha ki Mukreste, uka peta litaba kaufela za kona kuli mubone taba yeñwi ka mafosisa. Haiba una ni—ni mulelo ni sa bata kuipumanela mutu ka kueza kuli mu eze sani, ku mi eza kuli mi si bone ka nzila yani, uka mi bonisa lika kaufela za kona, ni ku mi zusa kwa niti ya zona, kakuli una ni maikuto a hae fela. Hakuna taba kamba uka puma cwani ka buhata, ni zeñwi kaufela, una ni za bata kuipumanela za buitati.

<sup>33</sup> Mi lani kona libaka Satani ha ezize se. Mi usebelize ka kufitela mwa bulumiwa kuli aeze zeo, sina Mulimu mwa na sepiselize kuli na ka eza. Cwale, na kalile ka bupumi bwa bulapeli mwa Edeni, mi uzwezi pili ku zwelela ona fani.

<sup>34</sup> Ha ki ka kutoma sikuwata sa baongaongi. Baongaongi habana sa kueza ka se. Ki keleke, kona fo lu lukela ku tokomela, mwabona. Ha ki—ha ki baongaongi baba ka puma ba Baketilwe. Ki keleke ye ka puma ba Baketilwe, mwabona. Ha ki baongaongi; lu ziba kuli ba latula Mulimu, mi ki ba antikreste, kaniti ki mo ba inezi, ka mayemo, kono ha ki ma antikreste. Antikreste ki bulapeli, bulapeli luli, mi wa kona kupeta Mañolo, ni kueza kuli A bonahale fo kusweu twaa.

<sup>35</sup> Sina Satani mwa na ezelize kwa mulaho kwani kwa simuluhu, na talusize lika kaufela hande, "Mulimu ubulezi kuli, 'Musike mwa ca kwa likota kaufela za mwa simu.'" Mwabona, ku Li talusa hande luli.

<sup>36</sup> Musali ali, "Ee, lwa kona kuca kwa likota kaufela za mwa simu, kono kuna ni kota mwahala simu yeo Mulimu na bulezi kuli musike mwa ca ku yona, kakuli, mane kutokwa ni haiba ku i swala; kakuli, ona zazi le luka eza cwalo, zazi leo lu ka shwa."

<sup>37</sup> Ki hali, "Oh, kaniti hamuna ku shwa. Kono talima ni kufe libaka leo Mulimu na bulezi cwalo, ki kuli . . ." Mwabona, fo cwale ki sikamañi? Na talusize Niti ye, mwa bona. Na ize, "Si ka kwalula meto a mina, mi li ka mieza kuli muzibe bunde ni bumaswe. Mu ka swana sina Mulimu kasamulaho, haiba mukona fela kueza sani."

<sup>38</sup> Ona sani kona sa bata fela kueza, mi yani ki taba fela yeswana ya lika kueza kacenu. Se kubile bupumi bwa bulapeli ku zwelela kwa simuluhu luli kwa Edeni, mi kubile ona cwalo kuzwa makalelo. Mwa nako ya Adama, neli buhata. Mwa nako ya Nuwe, neli buhata. Mwa nako ya Jesu, neli nto yeswana. Mi ni cwale ki nto yeswana, yona nzila yeswana, bupumi bwa bulapeli!

<sup>39</sup> Cwale, luka lemuha lifasi, fani Mulimu hana sa li busa. Cwale, fani Mulimu hana li busa . . . na li beile mwatasa tamaiso ya Hae. Mi cwale Satani ha natilo nga mupaka, ka kuhana Linzwi la Mulimu. Mulimu nako yeñwi nabile ni lifasi mwa tamaiso ya Hae. Na li beile mwa muzamaowalona. Na li beile, ku lieza kuli li beleke. Na ezize lika kaufela, nana ni lona mwatasa tamaiso ya Hae. Cwale lu ka bapisa sani ni kasamulaho Satani amano li beya mwa tamaiso ya hae.

<sup>40</sup> Cwale, ne ku ngile Mulimu myaha ye sikisi sauzande. Ne ku si ka Mungela butelele bo bu cwalo, kono Na ngile nako ye kuma fani kwa butelele. Myaha ye sikisi sauzande, kakuli lu lutilwe kuli “zazi lililiñwi mwa Lihalimu ki myaha ye likana sikitifa lifasi,” mi neli myaha ye sikisi sauzande, kamba mazazi a silezi kuli Mulimu abupe lifasi. Cwale, ne si tandile Mulimu myaha ye sikisi sauzande kwa ku li baakanya, ku li cala ka lipeu zende ni ku li tisa hande kuya ka mufuta wa zona kaufela. Sika kaufela si lukela ku tahisa za mufuta wa sona. Lipeu za Hae kaufela nelizende, mi ona cwalo kona mo li swanezi kutahisa mwa mufuta wa zona. Mulimu na ngile myaha ye sikisi sauzande.

<sup>41</sup> Ka kufeleteza, cwale ha Na felize ku li eza kaufela lona, mi ha feza lu ka . . . kufeleteza a punya fa katangando ka lona, ka lifasi, mwa sibaka se sindesene sili kwa upa wa Edeni, a si biza kuli ki simu ya Edeni. Mulimu na beile nkambe yetuna ya lifasi mwa Edeni, mwa Egepita, ona kwani kwa mafelelezo a upa wa simu kona kone kuna ni nkambe yetuna.

<sup>42</sup> Mi mwa buino kaufela, Abeya mwana Hae ni musala mwana Hae, fahalimwa zona kaufela. Yani ki niti. Sani kona sa na ezize Mulimu. Na ba beile mwa tamaiso yetezi. Ne ba kona ku bulela kwa liñungwa, mi neli tuhela ku fuka. Neba bulela kwa kota, mi ne i shenya kuzwa *fa kuya fani*.

<sup>43</sup> Tau ni sitongwani ne li fula hamoho, mi ngu ne ibuta bukaufi ni zona. Ne kusina bumaswe. Neli kozo ye petehile, kutwano ye petehile, lika kaufela mwa bupetehi, mi ki fo Mulimu ha na li beile mwa tamaiso ya Hae. Mi mulemuhe . . . Nana ni za Hae—Nana ni lifasi la Hae, Nabile ni lika kaufela mwa musebezi. Nana ni lika kaufela li nze litaha. Liki kaufela ne li pila kuca limela; neku sina se ne si shwa, ne kusina se ne si sinyeha, ne kusina sika sa kusinya. Hakuna . . . Neli fela kupetahala.

<sup>44</sup> Mi fahalimwa zona kaufela, Abeya bana ba Hae baba latiwa, mwana Hae wa mushimani ni mwana Hae wa musizana, muuna ni musala hae, kuli ba i buse.

<sup>45</sup> Mulimu na li ya tabile hahulu! “Mi ki Ha pumula kwa misebezi ya Hae kamukana, ka zazi la bu sebene,” mi a li bubeke ona lizazi la bu sebene lani kuba la Hae.

<sup>46</sup> Kakuli, Mulimu ki yena yana li tokomela kaufela, kasamulaho Afeza kuba ni lilimo ze sikisi sauzande inza bupa ni ku li lukisa hande, kuli tisa mwa kubateni; ni ku beya malundu

mwateri, ni kupanga mezi a mulilo kuli akashe malundu mwa halimu, ni lika zene ezahalile mwa ku pancaka kwa lona; a li omisa, mi a li beya ka nzila yana Nani. Mi neli sibaka se sinde.

<sup>47</sup> Ne kusina sene si swana ni lona, yona paradaisi yetuna ya Mulimu! Ni bo dainosa babatuna, ni zeñwi kaufela, inze li zamaya ku lona, ni lifolofolo zetuna; ne kusina kolofalo ku zona. Né li sina buhali neli swana fela sina kaze ya mwana. Ne lisina sesiñwi ni hanyinyani; nekusina—nekusina matuku, neku sina maswabi; nekusina kokwani ya butuku mwa lifasi. Oh, a ki sibaka ni seo!

<sup>48</sup> Linyunywani zetuna inge li bapala kuzwa kota ye kuya kwa kota yeñwi, mi Adama na li biza ka mabizo a zona, mi ne li fufela fa maheta a hae ni—ni ku mu njomanjoma. Mi, oh, ki sibaka mañi kwa bunde seo Mulimu nana ni!

<sup>49</sup> Mi ki ha panga yeñwi ya milelo ya Hae kuzwa mwa Mubili wa Hae Tota. Mulimu una ni milelo mwa Mubili wa Hae.

<sup>50</sup> Sina, mina hamuli mulelo wa bo ndata mina. Mi, mu lemuhe, nemuli ku bo kuku wa bo kuku wa kuku. Kono, mwahali mwani, lu bulele kuli, lu ka shetumuka fa sibaka sa mina ni bo ndata mina. Cwale, ne mu sazibi sika kaufela hane musali ku bo ndata mina. Kokwani ya bupilo izwanga ku muuna. Muuna ki yena ya nani kokwani ya bupilo; musali una ni—ni lii; cwale, kabakaleo, kokwani ya mwa mali ina ni bupilo mwahala yona. Mi, he, fane hane muli ku bo ndata mina, mane neku sina sene muzibe ka sona. Kono, niteñi, sayansi ni Linzwi la Mulimu li paka kuli nemuli ku bo ndata mina, kono neku sina sene muziba ka zona.

<sup>51</sup> Kono he ndate na latile ku mi ziba. Ni ka kutwano ya tamahano ni bo maa mina, mi se mu to zibahazwa ku bo ndata mina. Cwale, mina mu milelo ya bo ndata mina. Mu bonahala sina bona, mi muna ni likalulo za mubili ze bonahala sina bo ndata mina.

<sup>52</sup> Cwale, cwalo kona mwana inezi Mulimu kwa simuluhu. Mwana wa mushimani kaufela wa Mulimu ni wa musizana wa Mulimu nali ku Mulimu kwa simuluhu. Ha muhupuli cwalo cwale, kono nemuliteni kwani. Na zibile cwalo. Mi Na bata kuli mube teni kuli Akone ku ambola ni mina, ku bulela ni mina ni ku mi lata, ni ku mi swala kwa lizoho.

<sup>53</sup> Kikuli ha mutabeli mushimani wa mina . . . Kana ha ki zazi lelinde la kuli mushimani wa mina ataha kwa ndu mi aine fa tafule? Ha sa kutile kwa ndwa, kamba taba yeñwi, utaha ni bi bonena; mo mu ka akufiseza lico za mulalelo; mu ka bulaya namani ye nunile, kamba kaufela se mu ka kona, ni ku mu lukisa yona! Ki nama ya mina ni mali, mi nali mwahali ku mina. Ne mu sa mu zibi ka nako yani, kono ne mu ziba kuli naliteni kwani.

<sup>54</sup> Mi kacwalo Mulimu na zibile kuli lukaba teni fa, kono he Na lubeile mwa mubili kuli lu kone ku ikambota. Fakuli A kone

ku ambola ni luna, Na tiloba alimuñwi wa luna fani ha Na tilo pepwa ali Jesu Kreste, yena Mwana Mulimu Kasibili, mutalelela wa ponahazo ya Mulimu. Kacwalo wani neli mulelo wa Mulimu, kwa ku bonahaza milelo ya Hae mwa milapelo.

<sup>55</sup> Hane Ni li ku bo ndate, Ne ku sina sene ni ziba ka sona. Kono hane Ni tiloba mwana mushimani wa bona, Ne nili mulelo, siemba sa bo ndate. Mi ni mina mu siemba sa bo ndata mina.

<sup>56</sup> Mi kakuba bana ba Mulimu, lu siemba sa mulelo wa Mulimu wo noli ku Yena, o ezizwe nama sina Yena mwa na bezi nama, ili kuli lube ni kopano yomuñwi ni yomuñwi, sina lubasi lwa Mulimu fa lifasi. Mi wani neli mulelo wa Mulimu kwa simuluho. Eeni, sha. Sani kona sa na bata Mulimu kwa simuluho.

<sup>57</sup> Nana ni lika kaufela mwataswa tamaiso ya Hae. Mi ki Ha sikululela mutu mwa simu ya Edeni, kuba wa tukuluho ya buiketelo; lu bulele kuli, “Mwana ka, ki za hao.”

<sup>58</sup> Ha ki sibaka kwa bunde! Mulimu na tabile hahulu, kufitel A kuta fela ku yo pumula mwa misebezi ya Hae kaufela. Kota kaufela ne i sa tisi miutwa ni liseto. Ne kusina mimbulukushu ye ne mela fa kota ya miutwa. Liki kaufela nelili ka kupetahala. Lipeu kaufela ne lipetehile. Liki kaufela nelili mwa buino bo bupetehile.

<sup>59</sup> Mi cwale fani ha Na ilo pumula nyana, sila sa Hae sa shondaelela ka buhata nyana, mi sa to inga sibaka, ka ku sa toloka hande mulelo wa Hae kwa bana ba Hae. Fani, Na beile sepo ku mwana Hae Luli; sina mina ha mubeya sepo ku mwana mina wa musizana haile kwande busihu ni muuna; ha mubeya sepo ku mwana mina wa mushimani ha zamaya ni mushimani ya nwa kamba mushimani ya zuba. Mwabona, Ubeya sepo ya ku mwana Hae wa mushimani, kuli hana kueza sika se si fosahalile kaufela, mi ki ya ka buluka Linzwi kaufela la Na bulezi. Kono sila na tilo icocomeza mwateni; sina mushemaeti yani yana ni mafula yana ka nga mwana mina wa musizana ni ku sa ikuteka ili yena; kamba—kamba musali yomuñwi ya kona kunga, kuli azamaye ni mwana mina wa mushimani, mi ni taba yeswana. Mwabona, na icocomelize mwateni. Sila sa Mulimu ne si icocomelize mwateni ni ku tokwa ku toloka hande Linzwi ku Eva.

<sup>60</sup> Cwale, yena, ka kuwa kwa, ku se kungile lika zeñwi ni ku yola simu ya Edeni, yena kasibili. Na ingile kuiyola. Mi cwale u sa bile ni myaha ye sikisi sauzaande ya puso ya buhata; kupuma sicaba, bana ba Mulimu, sina mwa na ezelize kwani. Kakuli, ne ba itingile fa tukuluho ya buiketelo, ka kueza ka mukwa kaufela one ba lakaza kueza ka ona. Ni ku lumela kuli ne ba ka eza ka swanelo, kamba ku sepa kuli ne ba ka eza ka swanelo, mi ki ha ba taha ka kezo ye fosahalile, mi ba lekisa litukelo za ku pepwa kwa bona, sina Isau mwa na ezelize, kwa lifasi. Mi ni Satani sa li wina, mi a linga ni ku li busa. Mi u sa bile ni myaha ye sikisi

sauzande inza yaha Edeni ya hae, sina Mulimu mwa na bezi ni myaha ye sikisi sauzande fa kutisa Edeni ya Hae kwa kufela. Mi ka bupumi, bupumi bwa Linzwi, kamba sicaba, cwale a toma Edeni ya hae mwa lifasi le, mwa sibi.

<sup>61</sup> Edeni ya Mulimu ne itomilwe ka kuluka. Edeni ya Satani ne itomilwe mwa sibi, kakuli Satani ki sibi. Mulimu ki kuluka, mi ni mubuso wa Mulimu ne utomilwe mwa kuluka, ni kozo, ni Bupilo. Mi kuyaha kwa Satani ku inzi mwa sibi, mi ili sibi sa bulapeli.

<sup>62</sup> Mulemuhe mwa na pumezi, bupumi bwa hae, sina hana bulezi kuli uka eza cwalo. Na sepisize kueza sani. Kana kuna ni ya ziba cwalo? Ha lu apuleñi mwa Isaya, haiba mwa bata Mañolo amañwi ateni. Haiba muka... Ni lukela ku bulela amañata a ona, Na sepa. Ha lu apuleñi mwa Isaya kauhanyo ya 14, fa nako nyana fela, mi kipeto lu bone seo Satani na bulezi fa, fa muzuzu fela. Mwa Isaya 14, lu ka ibala, mi lubone sa na ezize mucaha yoo. Isaya 14, lukale ka timana ya 12.

*Kana uwile cwani kwa lihalimu, Wena Lusifa, mwana wa kakusasana! u latezwi cwanifafasi, wena ya na fokolisa linaha!*

*Kakuli wena no ize mwa pilu ya hao kuli, Ni ka kambamela kwa lihalimu, Ni ka kambamiseza lubone lwa ka fahalimwa linaleli (bani ki bana ba bashimani), linaleli za Mulimu: mi Ni ka ina hape fahalimwa lilundu la kopano,... kwa neku la mutulo:*

*Mi Ni ka kambamela fahalimwa butelele bwa malu; mi Ni ka swana sina Muambakani ya pahami.*

<sup>63</sup> Cwale mubapise sani ni kwanu ka Mañolo aluna mwa Matesalonika, fa nako nyana yefile, ka mwa na bulelezi, "Uina mwa tempele ya Mulimu, kuipaheka yena muñi fahalimwa se si bizwa Mulimu kaufela, ili kuli yena sina Mulimu mwa lapelelwa kuba sina Mulimu fahalimwa lifasi."

<sup>64</sup> Ki yani fani mulimu wa lifasi le yene Ni kile kutaza ku mina ka za hae Sunda ye felile. Ki yo fa kacenu mwa bupumi, ona hola ye maswe yani, nako yende ye lupila ku yona. Ki yona nako yende hahulu ya masika kamukana, kakuli lu talimele Mileniamu yetuna hape; lu libile kwa Edeni hape. Kono ona fa lusika lo, bupumi kaufela ni makilikicani kaufela akile aitusisa mi mane ni ao akonile kupuma ka ona, kaufela u akopanyize hamoho ni ku isileleza ili yena; ni ku shetumuka sina Mulimu, mi uiipeile mwa sibaka sa Mulimu; bulapeli, mi wa kona ku bulela Mañolo ni ku mi taluseza Mañolo, sina fela Satani mwana ezelize ku Eva mwa simu ya Edeni. Kono na siile siemba silisiñwi sa Lona, kona za lukela kueza, kueza pakani yani, fo ku suluhela tuto ya mabeela ya diabulosi, inge Sefa ya mutu ya nahana yene lu bulela ka yona busihu bobuñwi.

<sup>65</sup> Cwale, na bulezi kuli uka ipahamisa ili yena fahalimwa Muambakani ya pahami; na ka kambamelia fahalimwa malu ni linaleli, mi na ka ina fani sina Mulimu, mi abe fahalimwa Muambakani ya pahami. Mi mane ukonile mwa kutundamena kulwala mifumbo ya hae. Yena mane na konile hande mwa ku ezeza mifumbo ya hae, ka sicaba ha si mu tuhela aipulela cwalo, mwa lusika lufi ni lufi, butokwa bwa sepiso ya Linzwi la Mulimu kwa lusika lwani. Ona cwalo kona mwa ezelize. Mwa lusika kaufela, na Li tatuluzi ka nzila yani.

<sup>66</sup> Mwa mazazi a Nuwe, na tatuluzi kuli nekuli tata hahulu kuli pula inele kuzwa kwa lihalimu, kakuli, “hakuna pula mwa halimu mwani.” Ona evangeli tuna ya sayansi yana katalize mwa simu ya Edeni! Na konile ku kunupa lipangaliko zeñwi fa kweli mi ba lemuhe kuli nekusina mukamo mwani. Kono Mulimu ali ku ka taha pula. Kono Satani a hapeleza, mi a shemaeta mihupulo ya sicaba, ka lipatisiso za sayansi, kuli, “ne kusike kwa konahala.” Kono ne ku ezizwe. Mulimu na bulezi kuli ku ka ezahala, mi ne ku ezizwe. A peta cwalo.

<sup>67</sup> Cwale, mwa mazazi a—a Jesu, na ezize taba ye swana. Na shemaetite mihupulo ya bona hape ka bupumi, mwabona, ku sa toloka hande Linzwi. “Haiba ki Wena Mwana Mulimu, cwale halubone ni Ku bone ha u eza sesiñwi ka sona.”

<sup>68</sup> Jesu na si ka mu sehisa. Na si ka eza cwalo. Mulimu ha na lisheha. Ha tokwi ku alaba sika kaufela sa ka buza Satani. Na nani fela ku . . . Jesu na bulezi kuli, “Ku ñozwi, ‘Ha una kupila . . . Mutu hana kupila ka buhobe fela, kono ka Linzwi kaufela le li zwelela mwa mulomo wa Mulimu.’” Mwabona, Na si ka eza lisheha, ku yena. Na sa tokwi kupanga sinkwa. Na ka kona kueza, kono Na ka teezeza ku diabolosi, kacwalo Na sa lukeli ku teezeza ku diabolosi.

<sup>69</sup> Mi hape ki sibi sa bulapeli, sina kwa simuluhu, ka bupumi luli. Mulemuhe cwale. Ha ki sibi fela sa zazi ni zazi, kueza boozwa ni ku kolwa, ni ku itusisa Libizo la Mulimu mwa mbango. Ha ki zona zani. Batili.

<sup>70</sup> Mwa hupula lilimo za kwa mulaho, buñata bwa mina mo, mina bakale, mwa hupula kutazo yene ni kile Na kutaza, ka, *Kuswaba Kwa Katulo*. Lihule, halina ku yo swaba kwani. Wa ziba kwa ya. Cakolwa hana ku yo swaba kwani. Mukondoli wa mutoho, mulauli, lihata, lisholi, ha na ku yo swaba. Kono, yena mutu ya nahana kuli u lukile yani, kwani kona ku swaba.

<sup>71</sup> Yani kiyena mutu wa teni, yali, hataha uka bulela kuli, “Mulena, kikuli ne Ni si ka kutaza Evangelii, kikuli ne Ni si ka leleka mioya ye maswe nji, ka Libizo la Hao?”

<sup>72</sup> Jesu ali, “A muzwe mina. . . . ku Na, mina baezi ba ze maswe. Mane nali kuba ni mi zibe.” Kwani kona ku swaba, mwabona, ona bupumi bwani.

<sup>73</sup> Sani kona se Ni tundamena . . . fani kona fo ba sa Ni utwisisi. Ha ki kuli Ni bata kuba ya shutana. Ha ni tabeli kuba ya shutana, kono Ni lukela kuba ya sepahala. Ni na ni Liñusa, mi Li lukela kuya kwa sicaba. Li palelwa ku utwisiseha mwahala sicaba. Ba nahana kuli Ni lwanisa batu kaufela. Ba lukela kuziba fela kuli, Ni yemela mutu kaufela, mi ni lika mo ni konela kamukana kwa ku batiseza sesili Niti, sina mo kuinezi mwa pilu yaka ni mo kuinezi mwa Bibele mo. Mi ni Mulimu upaka cwalo kuli ki Niti, kacwalo hakuna sesiñwi kaufela se si kona kuezwa ka sona. Kacwalo, kube kuli ba talime ku Lona, kusi cwalo ha ku konahali.

<sup>74</sup> Mwabona, ha ba tabeli ku Li bona, kakuli ba lekisize kale za teni, ba lekisize kale tukelo ya ku pepwa kwa bona kwa kopano yeñwi, kopano yeñwi ya puteho; kulika ka litukelo za ku pepwa kwa bona, kuya kwa Lihalimu ka kuitinga fa mayemo a kopano yeñwi ya bulapeli bwa ku ongaonga, ili zeo Satani ki yena toho ya zona mwa buino kamukana. Mulimu ali kuba abe ni bulapeli bwa ku ongaonga, asamba kuba. Mi kipeto ba itekisa ku zani, kuli mane, kakuba sikuwata sa baana, ba toloka Linzwi ni ku bulela kuli Li talusa *se* mi Li talusa *sani*.

<sup>75</sup> Mulimu hatokwi mutoloki. Wa i tolokelanga Isali Yena. Ha tokwi ufi kaufela kuli a Mu bulelele mwa ku ezeza ka zona. Yena u ipitezi. Na bulezi mwa Na ka ezeza, mi yani kona nzila Ya lukela ku bu lukela Linzwi la Hae. Fani ha Na ize kuli, "Lisupo ze li ka latelela ba ba lumela," Na talusa ona cwalo fela. Kaufela sa Na bulezi kuli si ka ezahala, Na bulezi kuli ne si ka ezahala mwa mazazi a maungulo, kuli Na ka eza litaba za kuli, mi ki Za ezize. Ha lukeli kubuza mutu kuli kana se li nako kamba cwani. Wa ziba seo nako ili sona, ni seo mulelo uli sona.

<sup>76</sup> Cwale, Satani, mupumi yo, sina ha ku bulezwi mwa Mateu 24:24, ka bupumi bo buñata hahulu. Cwale, lu fumana kuli ka litukiso za hae za evangeli za butali, tuto yende, muikutekello o pahami, zwelopili, ni zeñwi cwalo, li loile sicaba se si bata ku sebeleza Mulimu, mwa ku lumela buhata bwa hae.

<sup>77</sup> Eva na sa lati kueza sani, kono na mu bonisize mo ne ku bezi butali mwahala zona. Na sa zibi; na tabela kuziba. Na si ka utwisia, kono na bata kuli a utwisisi. Mi Mulimu na mu bulelezi kuli asike kulika ku utwisia.

<sup>78</sup> Kana Ni ka utwisia cwani yeñwi ya litaba ze? Hanikoni ku liutwisia. Na li lumela. Hani lukeli ku li utwisia. Mulimu ki tumelo, mi isiñi kutwisiso. Lu lumelanga fela Sa bulezi.

<sup>79</sup> Cwale, mubapise Edeni ya Mulimu ku ya Satani cwale, kasamulaho wa lilimo ze sikisi sauzande za ku lyanganisa toloko ya niti ya Linzwi la Mulimu le li sepisizwe kwa lusika. Halu li bapiseni cwale, mi lubone ko lu ka yemela. Sina mwa na ezelize kwa keleke mwa—mwa nako ya Kreste, ku Jesu, kulika kubuluka—kubuluka bana baba utwela ba Mulimu kwa ku sa

ziba Niti. Bani ki ba Mulimu. Mulimu na beile bana ba Hae fa, milelo ya Hae, kuli ba utwane ni Yena ka Linzwi la Hae.

<sup>80</sup> Ku cwani kambe bo ndataho ne ba ka ku bulelala, mi wena u mwana ya likute ku bo ndataho, mi ba ku bulelala kuli, "Mwana ka, usike wa ya mwa mezi ainzi fande ani, ku yo tapa, kakuli kuna ni lihahabe mwa mezi ani"; mi yomuñwi wa taha kwa mulaho, mi uli, "Kaniti, mezi a mande aswana sina ani, hakuna lihahabe mwateni"? Cwale ki ufi yo mu ka teezea ku yena? Haiba u mwana wa luli, uka teezea ku bo ndata ho.

<sup>81</sup> Mi mwana mushimani wa niti kamba wa musizana wa Mulimu uka teezea Linzwi la Mulimu pili. Hanina taba ka sa bulela mutu ufi kaufela ka zona, ba ka nga Linzwi la Mulimu pili. "Kuna ni mabeeela mwa komoki," mi ba lumela cwalo.

<sup>82</sup> Kuba ni tumelo mwa Linzwi la Hae kamukana, Lipeu za Hae, ne li tisize Edeni ye kenile, lilato, ni Bupilo Bobusafeli. Zani kona ze ne itisize Edeni ya Mulimu, kukena. Mi ne itisize Edeni ye kenile, ya lilato, kutwisiso, kupetahala, ni Bupilo Bobusafeli. Sani kona sa sweli kucala Mulimu, Linzwi la Hae, Peu ya Hae. Cwalo kona mo ikabela Keleke ya Hae kwa maungulo; Ikaba nto ye swana.

<sup>83</sup> Mulemuhe, ki wo fa muhupulo. Musike mwa u libala. Ni ka bulela ka ona nako yeñwi kamba mwa Liñusa leliñwi. Kono, mwa ziba, Mulimu naize, "Peu kaufela itahise za mufuta wa yona." Kana ki taelo ya Mulimu yeo nji? Cwale ki bunde bufi bwa mukutazi kaufela, kamba mutu yomuñwi kaufela, kulika kupanga Linzwi lani ku bulela sesiñwi fela? Mwabona, Linzwi la Mulimu kaufela ki Peu. Jesu na bulezi cwalo, "Ki Peu yana cezi mucali." Kacwalo haiba Mareka 16 ki Linzwi la Mulimu, li ka tisa za mufuta wa zona. Haiba nji Malaki 4 ki Linzwi la Mulimu, ika tisa za mufuta wa yona. Mi sepiso yeñwi kaufela i lukela kutisa za mufuta wa yona.

<sup>84</sup> Mwa bona, mwabona Satani kwande kwani ka kuipata? Ulika ku bulela kuli, "Ha ki, ha ki cwalo." Kikuli mwa utwisisa nji? [Puteho ili, "Amen."—Mu.] Mwabona, Satani uli, "Oh, Sani ha ki sa lizazi le. Sani, sani—sani ki... Sani neli sa nako isili. Sani, sani ha si talusi cwalo mane."

<sup>85</sup> "Peu kaufela i swanezi kutisa za mufuta wa yona." Cwalo kona Mulimu mwa na tomezi Edeni ya Hae. Kana ki niti yeo nji? [Puteho ili, "Amen."—Mu.] Mi ki ye fa, cwalo kona Mulimu mwa tomela Keleke ya Hae, Linzwi kaufela ka mufuta wa Lona! "Mutu hana kupila ka buhobe fela, kono ka Linzwi kaufela le li zwelela mwa mulomo wa Mulimu." Mwabona? Satani, uka ikungela sesiñwi fela. Kono Mulimu naize, "Peu kaufela ka mufuta wa yona."

<sup>86</sup> Haiba sepiso ne i bulezi kuli, "Lisupo ze li ka latelela baba lumela."

<sup>87</sup> Cwale keleke i bulela kuli, "Amu ikopanye kwa keleke. Mupete lituto za tumelo. Kuziba katekisema."

Hakuna litaba ze cwalo mwa Bibebe.

<sup>88</sup> Kono Jesu naize, "Lisupo ze li ka latelela baba lumela: ka Libizo la Ka ba ka leleka mioya ye maswe; ba ka bulela ka malimi asili; ha ba ka swala linoha, kamba kunwa lika ze bulaya, halina ku ba tiseza kozi; ha ba ka beya mazoho ku baba kula, bao ba ka foliswa." Ki ufi mutu kaufela ya kona ku latula Zani? Mwabona?

<sup>89</sup> "Peu kaufela ika tisa za mufuta wa yona." Haiba u peu ya Mulimu, mulelo, yena mwana mushimani wa Mulimu, kona kuli Linzwi la Mulimu li cezwi ku wena. Mwabona? Mi cwale ha mu utwa Linzwi la Mulimu, "Lingu za Ka li utwa Linzwi la Ka; muzwahule halina ku mu latelela." Mwa utwa nji? "Kona kuli peu kaufela itahanga ka mufuta wa yona."

<sup>90</sup> Cwale lu fumana cwana, kuli peu kaufela itahise za mufuta wa yona, nekusina lifu mwa bunca . . . mwa Edeni. Hakuna kuba lifu mwa Edeni yo munca. Mwabona, ne ku sina, nihaiba sika silisiñwi kwanda kukena, busweu, ni Bupilo Bobusafeli.

<sup>91</sup> Cwale, ka ku sa lumela mwa Linzwi la Mulimu kaufela, ku tisize peu ya ku sa kena mwa Edeni ya Satani. Lukena cwale koo Satani angile lubona, sina antikreste, mwa—mwa Edeni ya lifasi le, yona Edeni ya sibi, bulapeli bo bu lyanganani. Na si ka kala kuli, "Ki na Satani. Kina lingeloi lelituna." Batili, ha ki ku ze cwalo, kono ki ka ku lyanganisa Linzwi la Mulimu. Mi ona cwalo kona mwa tiselize mubuso wa hae, mwa masika kaufela. Mi cwale mwa lusika lwa bupumi lo, uitukiselize ku lwala lubona lwa hae, ka sicaba sa hae! U icahezi Edeni ya butali bwa mutu, ya tuto, mi ya sayansi; yende, bakutazi ba sayansi, keleke ya sayansi, lituto za sayansi za bumulimu, lika kaufela ki za sayansi. Liki kaufela li itingile fa mayemo a zibo. Keleke kaufela iyahilwe fa butali. Ha i si ka yahiwa fa tumelo.

<sup>92</sup> Nako yeñwi Ne niilo ungeka mukopano kwa keleke ya mutu yomuñwi. Neli muyaho o mutuna kwa wiko. Muuna yomunde, mi a hana lika ze lu bulela ka zona ze. Kono niteni, na li . . . Ne ni mu tabezi; muuna yomunde, muuna ya hulile. Mi kopano ya hae hane iile . . . Ne ikwananga batu baba eza sikisi sauzande. Mi fami kopano ya hae hane i zwelanga fane, mwa sebelezo ya musihali, ne ba kona kueza mianda ye lishumi ka ye ketalizoho, kaufela bona ne ba apezi hande ka butali. Na ina fani mi na ba talima.

<sup>93</sup> Na kutilize sebelezo yende, muuna yani na kutilize. Mi cwale abuza haiba mutu kaufela na bata ku amuhela Kreste; kuli a nanule fela lizoho la hae. Mi hakuna ya na nanuzi lizoho la hae. Mi mafelelezo musali ananula mazoho a hae. Mi ki hali, "Ku lukile, cwale wena u Mukreste," mi a mu lukiseza kolobezo. Mi cwale ha na zwezi kwande . . . A yo neela mbututu, atubeta mbututu yomunyinyani ni ku mu lapelela, mi a lukulula sicaba.

<sup>94</sup> Cwale kopano ya hae hane izwezi fande; kaufela bona mwa bunde, baba itutile, batu baba na ni tuto. Mi Na ne ni yemezi kwa tuko, kuli ni lumelise muuna yani mwa lizoho ni ku mu lakaleza ku zamaya hande ka Mulimu, ha na ya musipili.

<sup>95</sup> Mi hane Ni ezize sani, se ku taha sikhata saka mwateni. Ne ba si ka mu lumeleza kukena mwateni inge kuna ni sicaba mwani. Se kutaha sicaba sa ka, mwa lipula za mawili, milamu, tumbeta twa bakuli, baba pulumuka, ni zeñwi kaufela. Mwabona shutano nji? Yani ki niti. Yani kona taba ye Ni ambola ka yona, mwabona. Mwabona, ki nto yeñwi ye shutana.

<sup>96</sup> Mi, ka butali bwa sayansi mwa kona kupanga *kutwisiso* ya Evangelii, kuli, mina, “yena ya lumela ku Jesu Kreste hana ku atulwa,” mwabona.

<sup>97</sup> Kono, “Lisupo ze lika latelela baba lumela,” mwabona, upalezwi kubeya Sani mwateni, mwabona. Na lumezi ku Jesu Kreste, u pilisizwe, haiba lisupo ze li latelela mulumeli.

<sup>98</sup> “Mi ya utwa Linzwi a Ka,” isiñi fela ku ikupulela, isiñi ku Li utwa ka lizebe, kono, “ku Li utwisia.” Mutu kaufela wa kona ku Li utwa; lihule la kona ku Li utwa ni ku siala ali lihule; mwabona, cakolwa wa kona ku Li utwa; lihata wa kona ku Li utwa mi asiyale ali lihata. Kono, “Yena ya utwisia Linzwi la Ka, mi alumela ku Ya Ni lumile, una ni Bupilo bwa kamita.” Ki fo he cwale, mwabona.

<sup>99</sup> Mi hakuna mutu ya kona kueza cwalo konji haiba nji Mulimu u mu ketile. Jesu naize, “Hakuna mutu ya kona kutaha ku Na, kwanda kuli Ndate A mu bize, mi ni bao kaufela Ndate a Ni file baka taha ku Na.” Amen. Kaufela zona liitingile fa mayemo ni kulemuha kwa makalelo kwa Mulimu. Upila anosi mi hakuna ya Mu bulelela sa kueza.

<sup>100</sup> Cwale, ka ku sa lumela, ka ku sa nga Linzwi la Mulimu ka kutala, ku tisize peu ya kusa lumela, ku sa kena, ya sibi, sitoyo, mi lifu la Kuyakuile liteni ka mukwa wa sibi, lusika lwa keleke ya ngana ya butu. Cwale mu utwile nji? Mwa lizazi le, kuli lifasi kaufela ha lili la bulapeli! Kana mu lemuhile sani? Lifasi kaufela ki la bulapeli. Mi mwa lusika lwa bulapeli lo, likeleke zetuna kwa maneku kaufela; lika kaufela, taba kaufela ifelela mwa buino bwa kulapela Satani. Ki se fa, ona mwa Bibele mo. Yani ki niti. Mi ona mwa ngana ya butu ye, mikopano ya lituto za bumulimu ze tisize mutu wa zibo ya butu ya lutilwe mwa ku bulelela, sa kueza, mwa ku ezeza maikuto a hae; ni lika zeñwi ze swana sina kulimbulula milelo ya butu, lilimo zetalu ni zene, ili kuziba mwa ku talimana ni muhupulo wa mutu. Mwabona, ki . . .

<sup>101</sup> Moya wa Mulimu ha ki sika sesiñwi sa kuli, mina, wa mi kenya mwa sikolo. Ki sika se si lukisizwe mwahali ku mina, ka lizoho la Mulimu ya Mata kaufela. Zibo ya mina haikoni ku kenyiwa mwa sikolo kamba ku ituta ka za yona. I lukisizwe kale,

ka lizoho la Mulimu ni kuziba kwa Mulimu kwa makalelo, ku mina. Yani ki niti.

<sup>102</sup> Cwale, ne itisize yona Edeni tuna mo ba pila cwale, Edeni ya keleke ya lifasi. Kaufela bona ba sweli ku tamahana hamoho kwa Katengo ka Swalisan, mi se i ya kwa kuba keleke ya lifasi kaufela zona litaha mwatasa toho iliñwi, ili koo Satani uka fiwa lubona, ona cwalo fela.

<sup>103</sup> Mi pizo ya mafelelezo i se ibiziwa, ku to nga Munyaliwa A si ka kena kale ku zani. Kakuli asa kena fela mwani, ungile nombolo ya sibatana, ni ku sinyeha, ha na kuzwa mwateni. Lani kona libaka, hali, “A muzwe mwahala bona, sicaba sa Ka,” a si ka kena kale ku yena, mwabona. “A muzwe mwahala bona, mi mu kauhane.”

<sup>104</sup> Cwale, sitoyo ni lifu, ni kauhano ya Kuyakuile kuzwa ku Mulimu, mwa Edeni ye; takazo, masila, kulyangana, (cwani?) ka kucala peu ye maswe.

<sup>105</sup> Si ni hupulisa pono yene Ni boni Ni si ka kopana kale ni sicaba sa Pentekota, ya Muuna yani ya na zamaya mwa lifasi kaufela, mwa busweu. Mu ni utwile ha ni bulela ka yona linako zeñata. Mi yomuñwi ataha mwa mulaho wa Hae, inza cala lipeu za sinyeha.

<sup>106</sup> Kono na winile ka swanelo, ku Eva . . . mwa simu ya Edeni, ka takazo ya Eva kwa sibi; takazo ya Eva, ya sibi. Mi, haiba Eva na lakalize butali, neli sibi.

<sup>107</sup> Mi cwale ha lu lakaza zibo, lu bata Ph.D., LL.D., ki sibi ka kueza cwalo. Zeo cwale ki litaba zetile, kono kona Niti yeo. Hakuna taba kamba li tiile cwani, niteni i sali Niti, mwabona. Ku lakaza zibo, kutwisiso!

<sup>108</sup> Taba yateni iyemi, fakuli, kacenu ha lu liki kutoma Linzwi la Mulimu mwa lipilu za sicaba. Lu lika ku itoma luna bañi. Likeleke lisweli kulika kutoma tuto ya keleke, mwa pilu ya mutu.

<sup>109</sup> Lu laezwi kutoma Linzwi la Mulimu. Paulusi naize, “Ne ni si ka taha ku mina ka manzwi a kalembeshwa ka mutu, kuli tumelo ya mina isike ya tiyela mwa butali bwa batu; kono Ni tile ku mina ka mata; mwa ponahazo ya Moya o Kenile, kuli tumelo ya mina itiyele ku Mulimu.” Ki fo he cwale.

<sup>110</sup> Mutu ha u lukeli ku ikangabeka ili wena. Lu li fumana mwahala . . . Mutuhele Mulimu aezeze mutu sika mi a mulume aye, mu ka fumana kuli mutu kaufela u lika kulikanyisa cwalo. Mwabona, balika ku itoma ili bona. Mutu kaufela, “Ni ezize sa kuli. Kina, Na, zaka, kopano ya ka, na, se,” ku ikangabeka ili yena. Ki sikamañi se lu kutaza ka sona, ki zaluna kamba za Mubuso wa Mulimu?

<sup>111</sup> Mutiiseze Linzwi la Mulimu. Muzuse ku sa lumela mi muyahe Mubuso wa Mulimu mwa pilu ya mutu. Mi Mubuso

wa Mulimu ha u koni ku yahiwa mwa pilu ya mutu kwanda kuli Mulimu ubupile mutu yani cwalo. Hakoni ku yahiwa mwateni... .

<sup>112</sup> Mi, muhupule, siemba sa bupumi, seo batu ba nahana kuli si lukile. Mwabona. "Kuna ni nzila ye bonahala kuluka ku mutu." Sibupiwa sa zibo kaufela si bonahala kuluka.

<sup>113</sup> Sina hane Ni mi bulelezi Lisunda zelikani za kwa mulaho; hane Ni yemi kwa tuko ni mbututu wa ka ya na shwa, mi Satani inza yemi fani ali, "Ki bani bo ndataho fani, ne ba shwezi mwa mazoho a hao busihu bobuñwi. Ki yani fale musala hao ulobezi mwani mwa—mwa ndu ya ku omisa litupu, mi ki yo faa mbututu wa hao wa ikela. Mi u Mu kupile kuli a ku alabe, mi U hohile za... U ku hohezi muluti fa halimwa hao. Cwale, kono niteni Yena ki Mulimu yomunde, ibo ni cwalo ubulezi kuli Nali Mufolisi. Mi wena, ya yemela zo no bulezi kuli ki za niti, u lyangani." Oh, mulelo kaufela, buino bwa zibo ya butu kaufela ne bu na ni ku lumelelana kuli ne ku lukile; mi na bulezi niti, kufita fani.

<sup>114</sup> Mi na li ya lukisize ni fani ha na ambozi ni Eva, "Meeto a mina aka toni, mi mu ka ziba bunde kwa bumaswe. Mi mu ka ba sina balimu, ka nzila yani, kuziba bunde kwa bumaswe," kakuli Mulimu na si ka ba lumeleza kuli ba bone pili, kuli nebali mapunu. Kacwalo ne ba ka ziba bunde kwa bumaswe; mi na bulezi niti. Kono, mwa bona, ne li shutana kwa Linzwi la Mulimu.

<sup>115</sup> Mi ona cwalo kona mo ba evezanga ni bakutazi mwa mikopano ya lituto za bumulimu, ku ituta zibo ya ipangezi mutu; kwa kona ku bonahala hande, i kona kuba kutwisiso yende ya sika, kono i fosahalile.

<sup>116</sup> Halu lukeli ku Li utwisia. Lwa Li lumela kakuli Mulimu na bulezi kuli ku cwalo, mi sani si ka kondisa lika kuyakuile. Taba kaufela, yani kona nzila ya ku Li lumela ka yona.

<sup>117</sup> Oh, ka mo Eva na lakalize kuba ni Ph.D., mwabona, mwa na lakalize kuba ya talifile kufita mwa na inezi!

<sup>118</sup> Mulemuhe mo li swanelia, muuna ni musala hae... Cwale mulemuhe, muuna ni musala hae, sibeli sa bona mapunu mwa simu ya Edeni, Edeni ya Mulimu.

<sup>119</sup> Cwale Ni ka kwala. Ni bulezi kuli Ni ka ina fela ka mizuzu yelikani. Mutualime, mutualime cwale, ka kukwala.

<sup>120</sup> Mubapise se cwale, ki kuswana ko ku cwani kuli muuna ni musala hae, sibeli sa bona mwa Edeni ya Mulimu, kusina nihaiba bwanda bulibuñwi bwa litino fa mibili ya bona, mi ne ba sa zibi. Kakuli kiñi hane ba si ka ziba? Kakuli ne ba apesizwe lisila fa maikuto abona ka za mapunu, ka Lisila le li Kenile, la Moya o Kenile. Ne ba sweli ku talimana yomuñwi ni yomuñwi, mi ne ba

sa zibi kuli ne ba li mapunu. Ne ba apesizwe ka Moya o Kenile, wa kuluka. Ne ba apesizwe.

<sup>121</sup> Lisila la Mulimu, nihaiba kacenu, la kona ku talima mi ni ku tokwa ku lakaza. Ba sikulula toho ya bona. Ki Lisila le li Kenile, mwabona, Lisila leli Kenile. Mulimu nana ni meeto abona.... sibeli sa bona, yomuñwi neli muuna mi yomuñwi neli musali, mi ne ba sa zibi kuli ne ba li mapunu, kakuli kukena kwa Mulimu ne ku kwahezi meeto abona. Mulemuhe, Mulimu na patile lizwalo la bona kwa sibi, ka Lisila le li Kenile.

<sup>122</sup> Kambe ne lu nani nako ya kuina fani, ka mizuzu ye likani. Mutualime kwanu, "Kakuli yena, mulapeli ha sa swalezwi hañwi," Maheberu, "mulapeli ha sa swalezwi hañwi, hasana maikuto a sibi ni hanyinyani." Sibi si takuzwi ku yena.

<sup>123</sup> Ne ni utwile Muzwale Neville hana bulela, kakusasana cwana; yomuñwi hakulata na mu buza kuli kiñi hane Ni si ka kutaza ka za Moya o Kenile, kiñi hane Ni si ka eza *cwalo*. Ki se fa. Moya o Kenile kona kezo ku mina. Ki Bupilo, isiñi maikuto; isiñi mikwa yemiñwi ya ponahazo ya nama. Kono Ki Mutu, Jesu Kreste, Linzwi la Mulimu li yahilwe mwa pilu ya mina, ku to fa mata Linzwi kaufela la lusika lo. Luli. Mutualime Moya o Kenile mwa muzamao, isiñi hahulu mwa ponahazo; kono, mwa likezo, seo Li eza kuya ka Linzwi.

<sup>124</sup> Mulemuhe cwale Moya o Kenile, wa Linzwi la Mulimu le li Kenile, nana ni muuna ni musali bene bali mapunu, mi ne ba sa zibi. Ha ki bunde ni boo, Bupilo bwa Linzwi; yona Peu, ili Linzwi!

<sup>125</sup> Mulimu naize, "Kuna ni kota mwahala simu, ili musali. Mi fahala simu kona fo ku inzi kota ye; mane musike mwa iswala. Kakuli, zazi le mu ka ca ku yona, lona lizazi leo mu ka shwa." Ne ba apesizwe ka kukena kuzwa ku yona, ne ba sa zibi sika kaufela ka yona, ne ba sa lukeli nihaiba ku iswala.

<sup>126</sup> Ne ba apesizwe ka kukena. Ne ba iketile mwa sipapela sa Mulimu. Ne ba pila. Ne ba sina lifu le ne li ba beile mwahali. Haleluya! Neba na ni lilato le li petehile yomuñwi ku yomuñwi, Bupilo bo bu petehile kuyakuile. Ne ba na ni lilato le li petehile, kutwisiso ye petehile ka za lilato la Mulimu. Ne ba na ni Linzwi la Mulimu, ni ku Li buluka. Mi ne ba pila ni kuiketa mwa Edeni ya Mulimu ya buiketo, kusina lifu, ni hanyinyani, kwa maneku abona.

<sup>127</sup> Mi, Satani anga Eva kuli ateeleze kwa evangeli ya hae ya lituto za bulapeli, yona evangeli ya zibo, sikolo se si pahami, litaba ze pahami za bupilo, zwelopili yende, tuto ye pahami, ni zeñwi cwalo; mi cwale hana konile....musali kuli ateeleze ku yena fa muzuzu fela, kwa kunahaniseza kwa hae (ili zeo lu laezwi kuli lu li hanyeze), ki fani hana mu ngile kuli ateeleze ku yona.

<sup>128</sup> "Cwale, mutualime kwanu, keleke ki ya *kuli-ni-kuli*. Se itomilwe kale. Luna lu yeñwi ya likeleke za kale mwa naha.

Mutoneli wa tolopo kona kwa putehelanga.” Hanina taba ka mo i inezi, mwabona. Haiba nji i lwanisa Linzwi la Mulimu, mu ilwanise. Yani ki yena sila sa mina. Sika kaufela se si lwanisana ni Linzwi ki sila sa mina.

<sup>129</sup> Yoo kaufela ya yemela Linzwi ki muzwale wa henu. Ki siemba sa hao.

<sup>130</sup> Mulemuhe, na ikapuzi Lisila le li Kenile, kubona seo sibupeho sa hae nesili sona; mubapise sani, seo takazo luli ikona kueza. Na zusize Lisila kuzwa fa meeto a hae, ona nto ye kenile yeo Mulimu na beile fa meeto a hae. Na bata zibo, ili kuziba seo neili sona; kacwalo ki ha apula Lisila kuli abone seo nesili sona. Na teeelizee ku diabulosi, mi mulemuhe sibaka sa na beilwe ku sona.

<sup>131</sup> Ba ezize ze swana mwa lusika ni lusika kasamulaho wa fani, kamita neli kunga siemba sa zibo ya butu; mi cwale ba yahile mibuso wa Satani, zibo, peu ya hae yana cezi, mi ungile lifasi kuba Edeni ya lifu.

<sup>132</sup> Cwale mulemuhe. Cwale mutualime mwa Sinulo 3, ona Lusika lwa Keleke ya Laodesia. Mu nahane mwa muhupulo wa mina.

<sup>133</sup> Cwale mulemuhe. Musali, Eva, ki kalibe wa Satani. Mwabona, Satani, yona noha, ne itile ku Eva pili Adama asika ya kale yena. Mwabona? Yani ki niti. Kacwalo a mu puma, mwabona; kacwalo Satani, yona noha, na li muuna wa Eva Adama a si ka mu ziba kale mane. Mwabona, na mu pumile. Bibele ne i buleziki kuli na ezize cwalo, mi musali aziba kuli nali mapunu, nako yani. Mwabona?

<sup>134</sup> Cwale mutualime fa—fa Keleke ya Lusika lwa Laodesia. Musali, yena Eva, uinzi sina kalibe wa Satani. “U fumile mwa sifumu sa lifasi; ki sibofu, uinzi mapunu hape, mi mane ha zibi cwalo,” sina mo ne kuinezi mwa Edeni ya Mulimu. Kono cwale, isiñi kuli Lisila le li Kenile liinzi fa pata ya hae, kono ki lisila la takazo. Kuli, musali na tubuzi Lisila le li Kenile la Mulimu, mi a apala lisila la zibo, la takazo. Mi cwale una ni lisila la takazo, kuli mane u “mapunu” ka yona kakuba sibi. U inzi “mapunu” fa mukwakwa, “mi mane hazibi ka zona.” Ki lihule fa mukwakwa. Basali ni tuputula cwalo, fapila pata ya Mulimu, ki lihule, “mi mane hazibi cwalo.”

<sup>135</sup> Mulemuhe, munge bahame ba luna. Cwale, haiba nji mubata ku bona buino bo keleke i kubona kacenu, mutualime mukwa o ba eza ka ona basali. Musali kamita uyemela keleke. Mwa Edeni ya Satani, ka sibi ni ku sa lumela, kulyangana kwa bulapeli; mibuso o lyangani. Mwa sibaka sa kunga Linzwi la Mulimu, bangile zibo ya kuituta kwa mutu. Mi kufita kuli bange Keleke, bangile kopano, mi basweli kuitisa kwa toho iliñwi yetuna.

<sup>136</sup> Cwale mulemuhe, kulyangana kuzwa kwa kuluka. Musike mwa mbwinja se cwale. Keleke ibile ni lisila la takazo le ku yona. Mulemuhe se li ezize ku yona. Li—li mu lyanganisize kuzwa kwa

kuba ya sina mulatu kuya kwa zibo. Mwabona? Ona Lisila le li Kenile, nali ya sina mulatu; ni lisila la takazo, una ni zibo. Wa ziba kuli i munati. Wa ziba sa ieza sikamañi, mwabona. Ki muselo, kota kuli ilakazise, ni kutalifisa mutu. Mwabona? Ulyangani kuzwa kwa kutokwa mulatu kukena kwa sibi, kuzwa kwa kukena kuya kwa masila ni takazo, ni kuzwa kwa Bupilo kukena mwa lifu.

<sup>137</sup> Mubuso o una ni kushwa. Mubuso o uka shwa! Mulimu wa Lihalimu u ka u yundisa mwa lifasi.

<sup>138</sup> Mulemuhe, mwa kulyangana kwa, kutahile kuzwa ku muuna kutaha ku musali, mi ni kuzwa ku musali kukena ku muuna, “mi niteni ha zibi cwalo.” Kalulo luli ya Edeni ya Satani, ha ne mu ka talima fa mikwakwa kacenu, kwa sicaba sa hesu sa kacenu.

<sup>139</sup> Mulemuhe, neli Eva yo Satani na itusisize kwa kutiseza Adama kueza sibi ka mata a hae a takazo. Cwale ka kuswana, ka kueza nto yeswana ni kacenu. Mulemuhe, kukuta milili, kupenta lifateho, kuapala ka mufuta wa kutokwa buiswalo, mwabona, wa eza cwalo, mi mane utokwa nihaiba kuziba kuli yeñwi ya lika zani ya lwanisana ni Linzwi la Mulimu. Kwa kukuta milili ya hae, ku mu panga kuba musali ya sa swalehi, wa lihule. Kwa kutina tuputula, li mubeya ka ku swabisa. Kuapala litino za batanya fela, ku mueza kuna lihule. “Mi mane hazibi cwalo,” isiñi bakeñisa kukena kwa Mulimu; kakuli ki takazo ya Satani. Na mu tiselize... Atiseza kuli Adama kuli amu lakaza.

<sup>140</sup> Mi a tubula liapalo za na mu tinisize Mulimu, kwa mulaho mwa Edeni, ka musipili wa hae mwa—mwa lihalaupe le. Na li tubuzi. Ki ha itubula ili yena. Mi, Mulimu na mu tinisize mwa mukata; ukalile ku tubulanga hanyinyani ka nako ni nako, cwale ukutezi kwa na inanga kwa simuluho.

<sup>141</sup> Cwale una ni Adama wa hae inza tina tunekunda twa hae yena musali. Muuna na tinile maputula a mufuta wa sisali, ni kuzwela kwande kwanu, Ha ni sepi kuli kuna ni muuna wa niti ku yena. Ki mufuta wa musali yo Ni ziba. Mwabona? Mwabona, musali ungile Adama wa hae ya lyangani kueza kuli abe sina yena, mwabona, unza tinile tunekunda twa hae. Na boni sa na kona kueza kwani ha na tubuzi liapalo za hae kaufela kwanda tunekunda twa hae. Twani ki tuputula. Luli, zani kona liapalo za hae ona tunekunda, mi fa Adama wa hae utinile cwalo ni yena cwale. Kikuli, kuya ka Linzwi la Mulimu la makalelo, “Ki maswabiswa kuli musali a apale liapalo ze lukela kuba za musali,” kuzwa mwa Linzwi la makalelo. Munahane ka zona!

<sup>142</sup> Cwale, ni muuna sa tinanga libyana za buipiteli, ni yena. Wa ikamunelafafasi, ubeya mwateni za ku tatanisa milili ya hae. Zeñwi za lifateho za bukuli hahulu ze Ni kile na bona mwa bupilo bwaka, ki banana babañwi ba mufuta wani kwande kwanu kacenu ni milili ya bona ye kamunezwi mwatasasi *cwana*,

ni mibalabala, milili ye cisizwe, ni mafula amañwi, ni ku cinca mubala wa milili ya bona, ni ku itatanisa ka kuputana, kupanga buipiteli. Wena kalibe tuni! Yani ki taba ye sabisa ku i bulela kwa katala, kono katulo ikalela kwa ndu ya Mulimu. Mane ha u sa ziba kuli u muuna kamba u musali. Mi Ni utwisia kuli Masole ba luna ba United States ba ka kala kutinanga tuputula. Yani ki niti. Mwabona mulyanganelo wa teni mo uinezi? Ki liapalo za musali; kutina za buikuhumuso bwa hae.

<sup>143</sup> Zazi leliñwi Ne ni kwani ku, Howard Johnson; isiñi yo yainzi fa, kono yani wa kwa mukwakwa o kambama. Mi Ne niinzi fela inge ni komokile. Ki ha se kutaha mushimani yomunyinyani cwalo, mulomo wa hae wali kuatama. Mi nana ni milili ye minsu fa, mi na ikamuzi sina *cwana*; ni kubeya kuwani kwateni, ni ku itatanisa cwalo, fa meeto a hae; kutalima fa halimwa meeto a hae, inza zamaya cwalo. Haiba Ni kile na bona kulyangana! Mwabona, na sa lumeli cwalo. Na bonahala kuli nali muuna, kono mwa moya wa hae nali musali. Ha zibi siemba sa ndu kwa fumaneha. Yani ki niti. Ki kulyangana ko ku cwani!

<sup>144</sup> Sani kona sa ezanga Satani. Wa lyanganisa linaha. U lyanganisa keleke. U lyanganisa sicaba. Ki lihata, mulyanganisi wa Niti ya makalelo.

<sup>145</sup> Mulimu na bupile muuna kuba muuna. Na bupule musali kuba musali. Mi A ba tinisa ka kushutana, mi Na bata kuli baine ona cwalo ni kueza ka nzila yani; yomuñwi ki musali, mi yomuñwi ki muuna. Na kauhanyize Adama mwa simu ya Edeni, mi a eza cwalo, akauhanya Eva kuzwa ku yena.

<sup>146</sup> Cwale utinanga libyana za hae za buikuhumuso; ukuta milili ya hae sina ya muuna, mi muuna ulika kutina sina mutinelo wa musali. Mwabona? Musali utina liapalo za siina kwande, mi ni muuna utina liapalo za sisali. Cwale, seo si utwahala kutokwa likute, kono ha Ni talusi ka mukwa wani. Kona Niti yetezi ya Evangelii. Haiba nji ha mu zibi cwalo, kona kuli kuna ni se si fosahalile ni mina; hakulata mu libofu kamba mwali kuba mu be fa mukwakwa. Mi musali ni muuna unahana kuli ona cwalo ku lukile, ba nze ba libile kokuñwi.

Basali bali, “Kihande, ku cisa hahulu!”

<sup>147</sup> Musame wa kale wa mu Apache Indian u ka ku swabisa hahulu. Bona kucise ku mane, kona mo ba ka tinela ni litino zeñata, ili kusaba lizazi ku bona; oh, ki ku fufuelwa luli, kacwalo mukone kuba ni sa kufukisa moya habanze ba zamaya. Mwabona? Ba yemanga fande mwa lizazi.

<sup>148</sup> Hakuna se mu yemanga ku sona; ne mu ka ba ni matutwa ni kuca. Kono, mwabona, ki se mu biza kuli tuto ye pahami. Sayansi ya kacenu kona ye tisize zeo. Oh, mawi! Ki yani fale, “mapunu,” mwa Laodesia, “mi mane ha zibi cwalo.”

<sup>149</sup> Nali mapunu mwa Edeni. Mwabona mibuso ye mibeli ye swana nji? Omuñwi ki wa sibi ni lifu; omuñwi ki wa Bupilo ni

kuluka. Mwahali mwani na apesizwe ka Lisila le li Kenile. Sibeli sa bona ne ba li mapunu; ne ba sa zibi. Ne ku sina se ne ba ziba ka zona, kakuli ne ba apesizwe ka Moya wa Mulimu.

<sup>150</sup> Mi fa ba apesizwe ka takazo, mi ba talimana ku yomuñwi ni yomuñwi kwa . . . Mwabona, Adama na talima Eva, mi na sa zibi musali u mapunu. Kono cwale ka lisila le la takazo, musali ha lemuhi kuli uinzi mapunu, kono u eza cwalo mwatasa lisila le la takazo kuli muuna a mu talime. Ki yona fela taba ya kona ku ezeza cwalo. Ha mulumeli cwalo, kono kauke mulumeli ni hakuli cwalo, mi muuna wa kona kutalima. Mi ufumani kuli wa ebelisa hahulu luli, kufitela hatile nga liapalo zeñwi za hao ni ku apala.

<sup>151</sup> Oh, ha ki kulyangana ni koo! Ki lusika mañi! Ki mufuta mañi wa nako yelu . . . Mo i bezi ye puma! Oh, lika ze kaufela, "mi mane ha ba zibi cwalo," moya o lyanganezi mukwazo uinzi ku mutu. U patezwi kwa takazo ya Satani, mi ni musali u cwalo, ni yena. Ki moya wa busatani mwa silalanda. Mwabona, ha ba zibi, kono ki kopano. Basali ni tuputula bali kutina, ki ba katengo. Muuna ya apala cwalo, ki wa mwa kopano. Ni ka mifa litaku ze yemela taba yeo, katengo Kakatuna ka Likezeli [Mwa Sikuwa B.S.S., Big Sister Society—Mutoloki], kacwalo kwani kona ko ba fumaneha. Muzwele kwande kwani, ki katengo kakatuna ka basali, baba tinile malukwe, baba bonahala ku tapaala ka butanya, ku bonahala masila. Ni—Ni . . .

<sup>152</sup> Muuna, cwale mwakona ku shutana ni na ka se, kono yani kona Niti. Mu lyanganisizwe mi ha mu zibi. Ha mu lemuhi, hamusa eza sina baana ni kamuta. Mwabona, kutaha ka bunolo cwalo; mi, mwana bona, hakuna kuba sika ku bona ni hanyinyani; baana, ni basali, ni bona. Ki katengo. Ku na ni katengo. Kiñi? "John, munyako o tatama, na tinile kaputula, cwale Na bo kiñi ha ni si ke kutina? Luella na bata kuli ni tine kakuli John na tinile cwalo, fa munyako o tatama. Mi, ki hande, haiba—haiba Susie Jane bakona ku tinanga zani, ku cwalo ni Martha Jane wa kona kutina, kamba Susie Lou," kamba ki mañi libizo la hae kaufela, mwabona. Mwabona, seli katengo. Ki katengo. Mu ba siemba sa teni ka moya, mi ha mu zibi cwalo.

<sup>153</sup> Mi haiba ku cwalo, mi lwa bona kuli ku cwalo, kacwalo mu libofu. Mu foufalizwe kwa likopano ze zona za mi kenyize ku zona Satani. Mi ki kulyangana kwa Linzwi la Mulimu la makalelo, ni Mubuso wa Hae, ni mulelo wa Hae kwa bana ba Hae. Satani u lyanganisize baana ni basali mwa lika ze, mi mane ha ba zibi cwalo. Ki kulyangana!

<sup>154</sup> Haisali mwana Mulimu! Mihala inge i lepelela kwa pata ya hae, ni kaputula cwalo, inza zamaya mwa mukwakwa; mwama mushimani wa Mulimu, dikoni mwa keleke, mulisana kwa katala? Batili, yani ha ki mwana Mulimu. Ha si ka taha ka Sefa ya ku nahana kwa Mulimu. Na si ke kutina liapalo za sisali zani cwalo; kaniti na si ke kueza cwalo; kamba musali na si ke kuba

ni litino za muuna cwalo. Mwabona, ha ki mwana mushimani wa Mulimu. Ki mwana mushimani wa Satani, ni mwana musizana wa Satani. Ki taba ye tata ku i bulela!

<sup>155</sup> Satani u pasize mwa ku lyanganisa ni kushimba lifasi le, ni ku lieza kuba mubuso wa hae; mutu yani na beilwe ku lona, ka tukuluho ya buiketelo, kuli aiketele yena muñi mufuta wa bupilo wa na itakaleza. Mi sani si bonisa sesili mwa pilu ya hao. Mwabona? Linzwi la mina . . . Mwa ziba kana? Likezo za mina libulela ka ku tumuka hahulu, li tima ni linzwi la mina. Uh-huh!

<sup>156</sup> Mutuhele kuli ni ye ku mutu. Mi uli, “Oh, Na . . . Kaufela luna lu Bakreste. Lu ba siemba sa keleke.” Mi liapalo ze belela li lepelela mwa ofisi ya hae? Huh! Hakuna shutana ye ka ba teni ku sa na ni bulela, Ne ni ka ziba hande; ku cwalo ni mina.

<sup>157</sup> Mutuhele kuli musali abulele kuli ki Mukreste, ni milili ye mikuswani? Huh-uh! Mu ziba hande kufita zeo, mwabona. Eeni, sha. Ha bulele kuli ki Mukreste, inza tola mipende ni mafula a kupenta, ni maputula, kono abulele ki Mukreste? Mu ziba hande kufita zeo. Linzwi la Mulimu li mi luta hande kufita ze cwalo. Linzwi li bulela kuli hakoni kueza cwalo mi asiale ali Mukreste. Yena mane u shwaukile, ni lika zeñwi. Kana Mulimu uka beya sika se si shwaukile mwa Mubuso wa Hae? Batili, sha, ha ku konahali. Batili, sha. Bonabañi, ba bonisa takazo ya bona.

<sup>158</sup> Hamukoni kunga nkwilimba kuli i sele ni maankoli, ha ku konahali. Nkwilimba haina nyoko ni ye kana. Ha ikoni kuca nkukwe ye lobezi. Kambe ne i ka lika kunjoma kwatenei hanyinyani, ne li ka i bulaya, mi ya ziba cwalo. Kono maankoli yakona ku ca sika kaufela se i bata. Mwabona? Ina ni nyoko ye ñata.

<sup>159</sup> Kacwalo he mufumana kuli, kona mo kuinezi cwalo mwa lifasi kacenu, taba yeswana, “Ba inzi mapunu, libofu, mi ha ba zibi cwalo.”

<sup>160</sup> Satani na ezize cwalo ka takazo ya musali ya zibo, ya kufosa, ili yeo na ketile ka yena muñi ka kuketa kwa hae. Cwale mulemuhe, neli Eva ya na etelezi Adama kwa bumaswe, mi neli musali ya na tubuzi liapalo za hae mane ni Adama wa hae a si ka tubula kale za hae. Mwabona? Ki musali, hañata. Ki mo kubelanga hañata. Ni cwale isali nzila ye swana.

<sup>161</sup> Ki keleke ye latehisa mutu. Ki keleke, mwabona, kona ye isa mutu yana bata kuba mwana mushimani wa Mulimu. Ki musali, yona keleke. Isiñi Bibele, Mulimu, kakuli Bibele ki muuna. Oh, eehe, “Linzwi ne li ezizwe nama,” mi Na li Mutu. Mwabona? Bibele ki mutu; keleke ki musali. Mwabona? Ha ki keleke . . . ki Bibele ye latehisa mutu. Ki keleke kona ye mu kelusa kulateha. Ki keleke kona kwana ile mapunu, isiñi Bibele. Mwabona? Batili, faa. Bibele imu bulela kuli uinzi mapunu. Eeni, sha.

<sup>162</sup> Cwale mulemuhe mo kuinezi, ka foso, takazo ya foso, na lakalize zibo, kuziba kuli neli *sikamañi*, ni mo ku ezezwa, kamba muselo wani neli o munde kamba nee. Mi musali aeza cwalo.

<sup>163</sup> Mulimu uka ikutisa zazi leliñwi, nihakuba cwalo, ka Muuna. Ne ifelisizwe ka musali. Kono ne i liuluzwi ka Muuna; yena Mutu, Jesu Kreste, yali yena Linzwi.

<sup>164</sup> Mi cwale ki sikamañi sani? Mulemuhe, ka kukwala. Kwanu ha ki kale hahulu, Ni bulezzi taba ye. Ni na ni mapampili alikana amane kamba a ketalizoho mwani, kono Ni... a Mañolo ni lika zeñwi ze ne Ni bata ku swanisisa teñi. Kono, muteeleze. Ha lu kwaleñi, ka ku bulela cwana.

<sup>165</sup> Muhupule, kwanu ha ki kale hahulu, Ne ni mi luta ka za Litolombita Zesupa, *Mukiti Wa Litolombita*, ni zeñwi cwalo. Mi Ne niize kuli, "Kuna ni mukiti wa lizazi la bu eiti." Kacwalo, lizazi la bu sebene ikaba la mafelelezo, lani ikaba la Mileniamu. Kono kuna ni mukiti wa lizazi la bu eiti; wo, haiba neli la bu eiti, mi kanti kuna ni fela mazazi a sebene, ne likaba lizazi la pili hape, mukuta hape kwa lizazi la pili. Mi, kasamulaho wa Mileniamu ku fela, kona ku ka ba kutomiwa kwa Edeni hape. Mubuso wa Mulimu o mutuna uka kutisezwa teñi. Kakuli, Jesu na ulwanisize ni Satani, mwa simu ya Getsemani, mi a wina Edeni mane ya kuta; kuli, U ile kwa kulukisa mwa Lihalimu, ku yo kuta hape, kukambama mwa Lihalimu. Na ize kuli, "Pilu za mina li si ke za filikana."

<sup>166</sup> Fani ha Na li fa lifasi fa, Na bulezzi kuli, "Mina, mina Majuda, mu lumela ku Mulimu. Cwale, Ni ziba kuli Ni ba ni libizo le li maswe," A bulela. "Mi ba bulela kuli Ni wa *kuli, sesiñwi*. Kono, mu lumele ku Mulimu; mi mu lumezi ku Mulimu, mulumeli hape ni ku Na." Na li Mulimu, ya bonahalile. Mwabona? "Mu lumele hape ku..."

<sup>167</sup> "Mwa ndu ya Ndate kuna ni ye miñata..." Kamba, "Mwa muleneñi wa Ndate, mwa Mulelo wa Ndate kuna ni mileneñi ye miñata. Ni sa yo mi lukiseza sibaka." Mutualime butelele bwa nako mo ku bezi, limaili ze mashumi a fifitini maneku amane kaufela! Muli, sikai sani? U ile kwa ku yo lukisa. Yena ki Mubupi. U bupile lika kaufela za gauda. Mikwakwa ya belela. Yena ki Mubupi. U sweli kulukisa sibaka. Mwani mwa Sinulo 21, na bulezzi kuli, "Mi Na Joani na bona Munzi o kenile, yona Jerusalema Yomunca, ha ushetumuka kuzwa ku Mulimu mwa Lihalimu."

<sup>168</sup> "Nekusina nuka ni iliñwi; lihalimu la pili ni lifasi la pili ne se lifelile." Ki afi anali mahalimu aluna apili? Neli Mileniamu. Ki lifi lifasi la pili? Neli le. Li ka yahiwa sinca. Sina fela mo ne li kolobelizwe ka Nuwe, mwa mazazi a kutazo ya hae; na kenisizwe ka Kreste, sina ha Na hasakile Mali a Hae fa halimwa lona; ni ku yahiwa sinca, kuzusa likokwani zetisa matuku kaufela kuzwa ku lona, kwa kuyahiwa sinca kwa maungulo, ka kolobezo ya Mulilo

ye ka bulaya kokwani yetisa matuku kaufela, butuku kaufela, makulano kaufela, masila kaufela akile aba mwa lifasi.

<sup>169</sup> Li ka panca, mi ku tahe Lifasi le li Nca. “Mi Na bona Lihalimu le li Nca ni Lifasi le li Nca. Lihalimu la pili, ona lifasi la pili le, ne li se lifelile; mi ne kusina lisa ni le li kana. Mi Na Joani na bona Munzi o kenile, yona Jerusalema yo Munca, ha ushetumuka kuzwa ku Mulimu mwa Lihalimu.” Kwani Mulimu ukaba ni milelo ya Hae ya niti, bana ba bashimani ni basizana, ko A kona ku kopana ni bona mwa kukena, ni meeto a bona inza kwalezwi kwa sibi kaufela. Hakuna kuba sibi ni se si kana kuzwa fani ku ya kwa pili.

<sup>170</sup> Halu itiiseni katata; musike mwa pumiwa mwa lizazi le, kono, “muikataze kukena mwa munyako.”

<sup>171</sup> “Kakuli kaufela baba ka siyala ikaba matanya, balakazi.” “Yo kaufela ya talima musali ka ku mu lakaza u sa mu bukile kale.” Kaufela ki . . . kwande ku kaba basali ba libubo le li maswe, baana ba libubo le li maswe, ni zeñwi cwalo.

<sup>172</sup> Mi ki bani fela baba liuluzwi, mi ba mwa Buka ya Ngunnyana ya Bupilo, kona baba ka kena mwa munyako. Ki fohe mutiise, balikani; musike mwa pumiwa mwa lizazi la maungulo le.

<sup>173</sup> Ye ki nako ye tuna. Mutu kaufela una ni masheleñi. Mañi ni mañi wa kona kueza *se*, mi mañi ni mañi wa kona kueza *sani*, ni masheleñi abuba kai ni kai, ni limota zetuna, ni lika kaufela. Hakuna kuba ni yeñwi ya zona zeo mwa Muleneñi wani. Hakuna kuba mota nihaiiba iliñwi, fulai iliñwi. Batili. Ikaba zwelopili ye shutana. Ikaba hape zwelopili isiñi ya zibo, isiñi ya sayansi, kono ya ku tokwa bumaswe, ni tumelo ku Mulimu ya pila.

<sup>174</sup> Halu itiiseni kukena Mwani. Kakuli wani kona mulelo wa ka ka kutala, ki kukena mwa Munzi wani zazi leliñwi; mi mutualime fela kwa mulaho, ha ne munze mutaha ni na, kubona mutu ni mutu wa mina ha caula, ha lu ka yo opela kuli, “baketwa ha ba kena ka kucaula.” Ni bata kuba mwa palo yani foo baketwa ha ba ta kena ka kucaula.

Halu lapeleni.

<sup>175</sup> Ndate Yomunde wa Lihalimu, mazazi anze aya kwa kukwala, mi lu bona kuli i zamaya isutelela, sepiso i sutelezi bukaufi. Lwa lapela, Mulimu Yomunde, kuli U beye sani mwa lipilu za luna, kuli lusike lwa eza mafosisa ni hanyinyani. Mulimu Yomunde, buluka lizwalo la luna linze li kenile. Buluka lipilu za luna linze li kwahezwi, Mulena, meeto a luna a kwaliwe kwa lika za lifasi, ni lika za mbango za lifasi, kanya ye sina tuso ya kuba mutu yo mutuna.

<sup>176</sup> Hakuna taba kamba ki babatuna cwani, lika kaufela, babusisi, baika, ni lika zeñwi kaufela li lukela ku yunda, mi habana ku zuha mwa nako ya bubel- . . . mwa zuho ya pili. Kakuli kuñozwi kuli, “Ufuyozwi mutu yana ni kabelo mwa zuho ya pili,

ku yoo lifu la bubeli halina mata.” O Mulimu! “Lifu la bubeli,” lona lifu la moya, “halina mata”; u liuluzwi!

<sup>177</sup> O Mulimu, ka kunahana kuli yeñwi ya lihola ze, alimuñwi uka yo potela yomuñwi, mi kipeto a ngiwe. “Bababeli mwa mumbeta; ku ka ngiwa alimuñwi, ni kusiyala yomuñwi. Bababeli mwa simu; Ni ka nga alimuñwi, ni ku siya yomuñwi.”

<sup>178</sup> O Mulimu, lutuse kuli lu be baba kenile fa—fa pila Hao, Mulena, hakuna taba kamba mutu u ka nahana sikamañi sa luna, seo batu babañwi ba ka bulela. Mulena, tuhela kuli kukena kwa luna . . . lingambolo za luna li be ze kenile. Li lungiwe ka Linzwi la Mulimu; likone ku lungiwanga, Mulena, kuli kutokwe bumaswe bo bu ka fumanwa ku luna. Halunze lu kupa, mwa lifoso za luna, kuli Mali a Jesu Kreste ayeme mwahala luna ni Mulimu, kuli Uka talimafafasi fo lu inzi ka Mali a Jesu; isiñi ka kuluka kwa luna bañi, bao luli bona, se lu ezize, kono ki ka sishemo sa Hae fela. Mulimu, lumeleza cwalo!

<sup>179</sup> Mi ku tokwe nihaiba alimuñwi ya liteni mo busihu bwa kacenu mi ya utwile Liñusa, kusike kwaba nihaiba alimuñwi ya ka lateha, kuzwa ku mwanana yomunyinyani ku yo fita ku yomuhulu. Mi takazo ya bona ye kenile ibe fela ku Mulimu ni Linzwi la Hae. Ha lu zibi hola Ya kona ku bonahala ka yona, kamba kuli ki hola mañi yeo Akona ku lu biza ku yo ikalabela kwa buse bwani bwa Katulo. Ha lu zibi kuli ikona kuba hola mañi Ya kona kueza sani, sina mo ne ku bezi, kunga kadi ya luna kuzwa ku amañwi, ni ku bulela kuli, “Seli nako ya kutaha kwa hae cwale. Mu lukela kuya.” Mulimu, lutuse kuli lu be baba kenile. Lumelela cwalo, Mulena.

<sup>180</sup> Lu konise kupila kufitela Kutaha kwa Mulena, haiba kwa konahala. Lukone kueza lika kaufela ze li mwa mata a luna, ka lilato ni kutwisiso, ku utwisisa kuli Mulimu usweli kutatuba lifasi, kacenu, kufumana ngu kaufela ye latehile. Mi lukone ku ambola ku zona ka tapelo ye lungilwe lilato ni Linzwi la Mulimu, kuli lu kone kufumana yani ya mafelelezo, kuli lu ye kwa Hae, ni kuzwa mwa Edeni ya kale ya Satani ye fa, Mulena.

<sup>181</sup> Ye yahilwe fela fa ku lakaza, ni basali babande, sina mo ba bizezwa cwalo mwa lifasi, ni lipapazo za bona kwani, “Lwa bapaza, mi lubata kuli bashimani ba tahe batolile mafula kwa lipata za bona, ni basizana babande ni tuputula cwalo,” fa mawayalesi aluna ni mazimumwangala; ni masila mwa mifuta kaufela ni busafa, ni Hollywood; mifuta kaufela ya foso, masila, lindelesi za masila za basali. Mi—mi baana basweli ku lyangani mi banga liapalo za basali, ni kukuta milili ya bona sina basali; mi basali sina baana.

<sup>182</sup> O Mulimu, ki hola ye cwani kwa kusabisa yeo lupila ku yona! Oh, taha, Mulena Jesu, taha! Taha, Mulena! Lukenise ka Mali. Zusa masila kaufela ni nyoko ku luna. Tuhela lu pile, Mulena,

tuhela kuli lupile mwatasa Mali, ka tundamo, fapila Hao. Ki takazo ya lipilu za luna, ni kupo ya luna ye sepahala.

<sup>183</sup> Mulimu Yomunde, ka kubeya fa katal- . . . kamba lipula zani, sipula, busihu bo, fo Evangel ne itomilwe. Mulena, mi fa kuna ni litaulo ni libyana nyana ze ka ya kwa bakuli ni baba nyandile. Tuhela kuli tapelo ya tumelo, Mulena, iwele mwa lipilu za luna cwale, fa pila Hao. Mi, Mulena, haiba ku na ni ku sa kena kaufela mwahala luna, Mulena, zusa zeo . . . luise kwa katulo cwale; mi lu kupa sishemo. Lu patululele se lu eza ka mafosisa, Mulena, kuli lu kone ku kupa, kwa Mali a lu kenisa. Folisa bakuli mi u ba eze hande, Ndate, kaufela seo sili sona, kaufela ko ba kaya. Ha kube cwalo, Ndate.

<sup>184</sup> Lufe tundamo ya ku Ku sebeleza, mi Wena unosi. Alaba cwalo, Mulena.

<sup>185</sup> Fa pukelezo kwa sicaba se si lateha se sili mwa linzila ku ya kwa hae.

<sup>186</sup> Lu itumezi ka Mo foliselize sicaba. Ni Kezeli Shepherd ni mushimani wa Muzwale Shepherd, yana holofezi fa njinga, Ni lapela kuli kusike kwaba bumaswe bo bu ka taha fateni; mushimani yani yana coba njinga ya hae, Ni lapela kuli abe hande. Lu itumela ku Wena ka foliso ya Hao ya babañwi bani bo lu kupezi kwateni. “Mi lu ziba kuli ze lu kupa, lwa amuhela, kakuli lu na ni sepo ku Yena ya lufile sepiso.”

<sup>187</sup> Lufe kwa muhau wa Hao, Mulena, mi ulu swalele libi za luna, lwa kupa ka Libizo la Jesu Kreste. Amen.

<sup>188</sup> Kana mwa Mu lata nji? [Puteho ili, “Amen.”—Mu.] Kana mwa Mu lumela nji? [“Amen.”] Kikuli mwa kula mi mukatezi ka mubuso wa Satani? [“Amen.”] Kana mwa lumela kuli mu taha kwa Mileniamu, kwa Mileniamu ya Hae; Yena, kwa Edeni ya Hae? [“Amen.”]

<sup>189</sup> Mu lumela kuli ku ezizwe cwalo kacenu? Mutualime, lika kaufela li itingile fa zibo ya butu. Kaufela, lika kaufela, li lukela ku pakiwa ka sayansi ba si ka li lumela kale.

<sup>190</sup> Mi hamukoni ku nyakisisa Mulimu ka sayansi. Mu lukela ku Mu amuhela ka tumelo, “Kakuli ya taha ku Mulimu u swanezi ku lumela kuli ki Yena, mi ki mufani wa zende ku baba Mu bata ka tundamo.”

<sup>191</sup> O Mulimu, Na ha ni lati kuziba taba isili kono kwanda Mali a Jesu Kreste a ni kenisa kwa sibi. Hakuna ze Ni ziba kono Jesu Kreste. Mi sina Paulusi wa kale hakile a bulela, ni Na ni bulela cwalo busihu bwa kacenu, “Hakuna se ni ziba mwahala mina, kwanda Jesu Kreste, mi Yena ya kokotezwi.”

<sup>192</sup> Zani kona ze Ni ziba ku mi bulelela. Kuli, Bibele ye, Na i lumela ka pilu yaka kaufela (haiba Ni ziba pilu yaka), kuba ye Linzwi la Mulimu le li petehile. Ka Se Na pila. Ka Se Ni yemi. Mi hane Ni kaba ni miyoye ye teni sauzande, Ne ni ka tabelia

siemba kaufela sa yona kuba sa Linzwi le, kakuli ki Linzwi la Jesu Kreste. Mi ha Ni na taba mo ba kona ku likela ku Li hanyeze, ka mo sayansi ika lika ku bulela kuli ha Li sepahali, ni zeñwi cwalo. Ku na, Kona taba fela inosi mwa lifasi ye Ni kona kusepa, ki lona Linzwi le. Ki wa ka. Na Mu lata. Mina bo? [Puteho ili, "Amen."—Mu.]

<sup>193</sup> Haiba ku na ni sibi mwa pilu ya mina, haiba ku na ni bumaswe mwa pilu ya hao, haiba mu na ni sika kaufela, mulapele cwale mi mu kupe Mulimu kuli a mi swalele. Mu ni lapelele; Ni ka mi lapelela. Mulimu ami fuyole, kona tapelo ya ka.

Kufitela lu kopana! kufitela lu kopana!  
Mulimu abe ni mina kufitela lu kopana hape!

<sup>194</sup> Kana mwa latana mañi ni mañi nji? [Puteho ili, "Amen."—Mu.] Joani naize, "Bana ba banyinyani, mu latane yomuñwi ni yomuñwi." "Mu latane yomuñwi ni yomuñwi, kakuli lilato likwahela libi zeñata." Cwale ha lu swalaneni mwa mazoho.

Mulimu abe ni mina kufitela lu kopana hape!  
Kufitela lu kopana! kufitela lu kopana!

<sup>195</sup> Cwale mu be ni makeke ku yomuñwi ni yomuñwi. Mu be ni makeke kwa batu kaufela. Munge ba henu hande. Mu tokwe kuba ni nyazo kufitela Jesu ataha.

...mahutu;  
Kufitela lu kopana! kufitela lu kopana!  
Mulimu abe ni mina kufitela lu kopana hape!

<sup>196</sup> Mwa Mu lata nji? [Puteho ili, "Amen."—Mu.] Yani kona tapelo yaka. Mu ni lapelele; Ni ka mi lapelela. Ni lukela kukutela kwa Tucson cwale. Mi Na—Na lapela kuli Mulimu a mi fuyole kaufela mina. Ni ya kuzwa kwani ku ya kwa Canada, ni kukutela kwa Colorado; kupotoloha, kupotoloha, kupotoloha, mwabona. Kufitela . . .

<sup>197</sup> Muzwale Tony uteni kwani, mi taba yetuna i ezahalile. Ona mwatasa Vatican, mwa Rome, ba bizaancafazo, mukopano, kuli ni ye kwani ni yo ungeka ancafazo mwa Rome, mwa Rome. Kona a sa zo kuta fela. Sicaba sikopani kaufela hamoho. Bana ni sibaka sesituna kwani, kuina ma sauzande ni ma sauzande, mi ba bata kuli ni ye kwa ancafazo. Ba bata kubona kanya ya Mulena mwa bulumiwa. Ha ni zibi. Ni lukela ku lapelela fateni, ni bone seo Mulena u ka ni bulelela. Oh, mawi! Muhupule, mulapele, kaufela luna hamoho. Lwa beleka . . .

Lu libelezi kutaha kwa Mupulusi wa luna ya  
fuyozwi,  
Amubone, mi mutualime matali a feiga cwale  
afetuha butala;

Evangeli ya Mubuso wa Hae ihasanezi mwa  
naha kamukana;  
Mi lu sutelezi kwa maungulo, mi kwa  
bonahala.

<sup>198</sup> Kana ki niti yeo? [Puteho ili, “Amen.”—Mu.]

Mi ka tabo lu ka zibahalisa Liñusa la ku  
bonahala kwa Hae ko ku fuyozwi,  
Cwanoñu U taha mwa kanya, ku bulelela  
alimuñwi ni kaufela;  
Ki fo he muzuhe, mina baba kenile ba Mulena,  
kiñi ha mu ozela kanti mafelelezo a sutelezi,  
Halu itukiseni kwa pizo ya mafelelezo yani.

<sup>199</sup> Uka sikuluhela kwa wiko mi a yo kuta hape, leliñwi la  
mazazi a, muhupule fela. Luli luli ku cwalo. Mi yani ki niti.  
Kufitela foo:

Unge Libizo la Jesu ko uya,  
Mwana wa manyando ni bumai;  
Li ka kufa tabo ni nyakalalo,  
U lingé, kaufela ko u ya.

Libizo Lelinde (Libizo lelinde), O kwa munati!  
Sepo ya lifasi ni tabo ya Lihalimu;  
Libizo Lelinde, O kwa munati! (kwa munati!)  
Sepo ya lifasi ni tabo ya Lihalimu.

Kukubama kwa Libizo la Jesu,  
Kuwela kwa mahutu a Hae,  
Mulena wa malena mwa Lihalimu lu ka Mu fa  
mushukwe,  
Fo musipili wa luna ufela.

Libizo Lelinde, O kwa munati!  
Sepo ya lifasi ni tabo ya Lihalimu;  
Libizo Lelinde, O kwa munati!  
Sepo ya lifasi ni tabo ya Lihalimu.

<sup>200</sup> Cwale, fa timana ya mafelelezo ye, ha lu iopeleñi ka lipilu za  
luna ze inami cwale.

U nge Libizo la Jesu ko uya,  
Kuba tebe kwa lilaba kaufela;  
Mi cwale miliko ha iku potoloha, (ona lika za  
mubuso wa Satani ze, mwabona, mwabona)  
Fela bulela Libizo leli kenile lani mwa tapelo.

<sup>201</sup> Ku felile; kipeto u ikele. La beleka. Ni li likile. Mu lumele  
fela cwale, kakuli li ka beleka. U bulele fela Libizo la Hae leli  
kenile mwa tapelo.

. . . ona Libizo la Jesu ni wena,  
 Kuba tebe kwa lilaba kaufela;  
 Mi cwale miliko ha iku potoloha, (Uka eza  
 sikamañi fo cwale?)  
 Fela bulela Libizo leli kenile lani mwa tapelo.  
 (Lisila lika taha fa sifateho sa hao ka nako  
 yeo.)  
 Libizo Lelinde (Libizo lelinde), O kwa munati!  
 Sepo ya lifasi ni tabo ya Lihalimu;  
 Libizo Lelinde, O kwa munati!  
 Sepo ya lifasi ni tabo ya Lihalimu.

<sup>202</sup> Halu inamiseñi litoho za luna cwale, ha nze Ni kupa Muzwale Beeler kwa mulaho kwani kuli atahé kwanu kwa pata. [Muzwale Branham ukala kuñuñuna *Unge Libizo La Jesu Ko Uya*—Mu.]

Fela bulela Libizo leli kenile lani mwa tapelo.

<sup>203</sup> Aku lu lukulule, Muzwale Beeler. U lu lukulule ka tapelo.

Libizo Lelinde,  
 Sepo ya lifasi ni tabo ya Lihalimu;  
 Libizo Lelinde (Libizo lelinde), O kwa munati!  
 Sepo ya lifasi ni tabo ya Lihalimu.

<sup>204</sup> Cwale ni litoho za luna ze inami, ni lipilu za luna liinami cwalo. Muzwale Beeler, alimuñwi wa balikani ba luna kwanu, Muzwale Estle Beeler, muzwale yomunde wa Mukreste, muuna ya ishuwile. Ni ka mu kupa kuli ato lukulula sicaba, busihu bwa kacenu, mwa tapelo. Mulimu aku fuyole, Muzwale Beeler. 

*EDENI YA SATANI* LOZ65-0829  
(Satan's Eden)

Liñusa le ka Muzwale William Marrion Branham ne li kutilizwe lwa pili mwa Sikuwa la Sunda manzibwana, Muyana 29, 1965, ili fa Branham Tabernacle mwa Jeffersonville, Indiana, U.S.A., liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi ne i hatisizwe ni kuhasanyiwa ki ba Voice Of God Recordings.

LOZI

©2018 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)